


SHEKHAWATI
Gospel According to Mark

चोखो बैद

हिया काया न निरोगो करबाळो



न्यु लाईफ लिट्रैचर
बैंगलूर - 560 043

शेखावाटि भाषा म
(मरकुस क हाथा माण्डेडो चोखो समचार)

चोखो बैद

हिया काया न निरोगो करबाळो

शेखावाटि भाषा म
(मरकुस क हाथा मण्डेडो चोखो समचार)

चोखो बैद
हिया काया न निरोगो करबाळो
शेखावाटि भाषा म
(मरकुस क हाथा मण्डेडो चोखो समचार)
Gospel according to Mark
Shekhawati

Year of Publishing : 2011

No. of copies : 250 (*Trial*)

© New Life Literature

मरकुस क हाथा मण्डेडो चोखो समचार की आ प्रति क्युक म बाँटबा तौई
हा था सजना स आ अरदास ह, थे इनै पढर थारा बिचार जो इ अनुवाद
न ओर चोखो बणा सकै, निचै लिखेडा पता प भेजर परमेश्वर का इ काम
म हाथ बटावो।

Illustrations on pages 2, 7, 27, 32, 34, 34, 40, 42, 47, 48 by Horace Knowles

© The British & Foreign Bible Society, 1954, 1967, 1972

Additions and amendments by Louise Bass

© The British & Foreign Bible Society, 1994. Used with permission

Illustration on page 49 is Used by permission.

© David C. Cook Publishing Co., 1978

Published by :

New Life Literature
Logos Centre, Horamavu Agara,
Hennur Road, Bangalore - 560 043

मरकुस क हाथा माण्डेड़ो चोखो समचार

भूमिका

परमेश्वर का बेटा ईशु मसी को चोखो समचार ई बात क सागै चालु होवै ह, “परमेश्वर का बेटा ईशु मसी को चोखो समचार।” ई समचार म ईशु न एक मेनती अधिकारी की जंय्यां बतायो गयो ह। अर बिको अधिकार बिकी सीख म, ओपरी बलाया प अर मिनखा क पापा न धोण क बारा म सामै आयो। इमै ईशु खुद न ‘मिनख को बेटो’ बोलै ह। वो मिनखा न पापा स अजाद करवा ताँई आपका पीराण देवा आयो।

मरकुस ईशु की सीख अर बचना प जोर कोनी देवै पण बिका कर्मा प जोर देवै ह। जणाँई तो वो बिकी कथा न साफ सिधा अर चोखा ढंग स पेश करै ह। यूहन्ना बतिस्मो देवाळो, ईशु को बतिस्मो अर बिका बिचासणा स जुडी बाता क पाछै, लिखबाळो हाथ की हाथ ईशु की सीख बिकी निरोगा करवा की बाता अर सेवा कामा को बखान करवा लागै ह। जंय्यां-जंय्यां टेम बित्यो बंय्यां-बंय्यां ही ईशु की बाता न मानवाळा ओर चोखा ढंग स बिनै जाणबा लाग्या, पण बिका सामला ओर ज्यादा खतरनाक होता गया। आखरी पाठ म ई धरती प बिका आखरी असा की बाता को बखान करता हुया, जामै खास खास बाता बिनै सूळी प चढायो जाणो अर बिको जी उठवो।

रूप -रेखा

चोखो समचार को चालु होणो	1:1-13
ईशु को गलील म लोगा की सेवा करणो	1:14-9:50
गलील स यरुशलेम को दोरो	10:1-52
यरुशलेम म आखरी असो	11:1-15:47
ईशु को जी उठवो	16:1-8
ईशु को दर्शाव अर ईश्वर नगरी म जाणो	16:9-20

यूहन्ना बतिस्मो देबाळा को हैल्लो

1 परमेश्वर का बेटा ईशु मसी^a को चोखो समचार अंय्यां चालु होयो।
²जंय्यां की यशायाह परमेश्वर की खेबाळा की पौथी म मंडय्यो ह।

“देख म तेरो गेलो बणाबा ताँई तेरै पेल्या मेरा दूत न भेजुँ हूँ।

³बीड म एक हलकारो हैल्लो मारै ह। की, ‘प्रबु ताँणी गेलो बणाओ, अर बिको गेलो सिधो-सपाट करो’।”

⁴यूहन्नो बीड क मांय आयो अर वो बठै बतिस्मो देतो अर परचार करतो हो की थे थारा हिया न पाप का गेलाऊँ बदळ’र बतिस्मो लेल्यो जिसै परमेश्वर थारा पापा न धो देसी। ⁵यहूदीयां

दिसावर अर यरुशलेम नगरी का घणक्राक मिनख बिनै सुणबा बिकै कनै गया। अर बे बठै जा’र आपका पापा न मान्या जिसै वो बानै यरदन नंदी म बतिस्मो दियो। ⁶यूहन्नो ऊँट क बाळाऊँ बणेडा गाबा पेरतो हो अर कमर प चमड़ा को पट्टो बाँध्या करतो हो। वो टिड्डिया अर जंगली शैद खाया करतो हो



टिड्डियाँ (1:6)

⁷अर वो मिनखा म परचार करतो हो की, “मेरै पाछै एक जणो आयो ह। वो मेर हू बोळो महान ह, अर म तो बीकाळा जूता का सळू खोलबा जोगो ही कोनी ⁸अर म तो थानै पाणीऊँ बतिस्मो द्युँ हू पण वो थानै पवित्र आत्मा स बतिस्मो देसी।”

ईशु को बतिस्मो अर परीक्षा

⁹बा दिना म अंय्यां होयो ईशु गलील का नासरतऊँ आयो अर बठै यूहन्ना स यरदन नंदी म बतिस्मो लियो। ¹⁰जंय्यां ई वो पाणी मऊँ बारनै निकळयो वो देख्यो की अकास खुलगो अर पवित्र आत्मा कबूतर की जंय्यां बिपै उतरी। ¹¹अर बादळा मऊँ हैल्लो आयो, “तू मेरो लाडलो पूत ह, म तेरुँ बोळो राजी हूँ।”

^a 1:1 मिनखा न पापा स बचाबाळो राजा

1:2 मलाकी 3:1 1:3 यशायाह 40:3

¹²इकै पाछै पवित्र आत्मा विनै हात्युहाथ जोर दे'र बीड़ म लेगी। ¹³बठै चाळिस दिना ताँई शैतान^b विनै बिचासतो रियो अर बो बठै जंगली जीनावरा क सागै रैहतो अर ईश्वर नगरी दूत बिकी खेचळ करता हा।

ईशु को सेवकाई करबो

¹⁴यूहन्ना न कोठड़ी क मांय न बन्द करबा क पाछै ईशु गलील गयो अर बठै परमेश्वर को चोखो समचार लोगा न सुणाबा लाग्यो। ¹⁵बो खयो, “परमेश्वर को राज कनै आबा को ठिक टेम आगो ह जिमै परमेश्वर राज करसी। ई ताँणी थे पापाऊँ हियो फिराओ अर परमेश्वर का चोखा समचार प विश्वास करो।”

मछुआ न ईशु बुलायो

¹⁶जद ईशु गलील दरियाव क किनारा किनारा जाय्यो हो जणा बो शमोन अर शमोन का भाई अन्द्रियास न देख्यो बे मछी पकड़बाळा हा, अर बि टेम बे मछी पकड़बा ताँई दरियाव म जाळ गेर्या हा ¹⁷ईशु बण स बोल्यो, “मेरै गेल आओ म थानै परमेश्वर ताँई मिनखा न ल्याबाळो बणास्युँ।” ¹⁸बे जाळ न छोड़'र बिकै गेल हो लीया। ¹⁹अर बे ज्युँई थोड़ा सा आगै ढळयाक जणा बानै जब्दी को बेटो याकूब अर बिको भाई यूहन्नो दिख्यो बे न्याव म जाळ सुधारा हा। ²⁰ईशु बानै तावळो सो आपकै कनै बुलायो अर बे आपका बाप जब्दी न मजुरा क कनै छोड़'र खुद बिकै गेल होगा।

मिनख मऊँ ओपरी-बलाय काढि

²¹अर बे कफरनहूम गया अर यहूदीयां का आबाळा अराम हाळा दिन^c ईशु यहूदीयां की प्रार्थना करबाळी झघा गयो अर मिनखा न परबचन सीखाबा लाग्यो। ²²लोग बिका बचना न सुण'र ताजुब म पड़गा। क्युं क बो बानै शास्त्रा न सीखाबाळा की जंय्यां परबचन कोनी देतो हो, पण एक अधिकारी की जंय्यां परबचन देतो हो। ²³बण यहूदीयां का प्रार्थना घर म एक मिनख हो जिकै मांय ओपरी-बलाय ही अर बो चाणचुक्यो ही जोरऊँ बार घाल'र ²⁴बोल्यो, “ओ

^b 1:13 भूत पलिता को सरदार अर मिनखा अर परमेश्वर को बेरी।

^c 1:21 यहूदी मिनखा को अराम हाळो दिन। बि दिन वै काम ऊँ अराम करता अर परमेश्वर क भवन म जार बीकी भगती करता हा जिनै सब्त को दिन बोलै है।

नासरत का ईशु थारो-म्हारो काँई लेण-देण के तू म्हानै तब्बा करवाताँणी आयो ह, म जाणूँ हूँ की तू परमेश्वर को खरो मिनख ह।”²⁵ बिकै अंय्यां बोलता ही ईशु बिनै दकाल्यो अर बिनै खयो, “तू चुपचाली रैह अर इमैऊँ बारै निकळ ज्या।”²⁶ ओपरी-बलाय बी मिनख न मरोड़’र बार घालती बिमै स निकळगी।²⁷ ई बातऊँ सगळाँ मिनख चोरंगा रैहग्या। अर आपसरी म बूझबा लाग्या, “आ बेधड़क सीखावाळी नई सीख काँई है? अर ओ ओपरी-बलाय न भी ओडावै ह, अर बे इको खयो मानै ह।”²⁸ अर आ कारनामा की टो-टो गलील अर बिकै कनै का सगळाँ गाँवा म होगी।

ईशु बोळा रोगला न निरोगो कयो

²⁹बो तावळो सो यहूदीयां का प्रार्थना घर स निकळ’र याकूब अर यूहन्ना क सागै शमोन अर अन्द्रियास क घरा गयो।³⁰ शमोन की सासु क उन^d होरी ही जि बजै स बा बिछावणा म पड़ी ही बिकै बारा म बे ईशु न जद की जद बताया³¹ ईशु बिकै कनै जा’र बिको बावळ्यो पकड़’र बिनै उठायो अर बा निरोगी होगी अर जणा बा बाकी सेवा पाणी करबा लागी।³² दिन आथ्या पाछै लोग रोगला न अर जिकै मांय न ओपरी-बलाय ही बानै बिकै कनै ल्याया।³³ अर पूरी की पूरी नगरी बारना क आगै उल्ट पड़ी।³⁴ ईशु बा रोगला न निरोगो कयो जो भाँत-भाँत की पीडा म हा। अर ओपरी-बलाय बी काढि। अर बो बा ओपरी-बलाय न बोलबा कोनी देतो हो क्युं क बे बिनै जाणै ही।

गलील म ईशु को परचार

³⁵बो भागपाट्या ही आपका घरा न छोड़’र उजाड़ म चलेंगे अर बो बठै प्रार्थना करबा लाग्यो।³⁶ शमोन अर बिका साथी-संगी ईशु न ढूँढबा निकळया।³⁷ बे बिनै ढूँढ लियो अर बोल्या, “सगळाँ मिनख तनै ढूँढै ह।”³⁸ ई बात न सुण’र ईशु बानै बोल्हो, “आओ ल्यो आपा दूसरी नगर्या म चालां, जिसै म बठै का मिनखा न बी चोखो समचार दे सकूँ ई ताँई तो म आयो हू।”³⁹ अर बो गलील का सगळाँ यहूदीयां का प्रार्थना घर म परमेश्वर को हैल्लो देतो गयो अर कई मिनखा मऊँ ओपरी-बलाय काढतो।

^d 1:30 जोर की बुखार।

ईशु एक कोढी को कोढ धोयो

⁴⁰ईशु क कनै एक कोढी आयो अर बो ईशुँ हाथ जोड'र अरदास करबा लाग्यो अर बोल्यो, “ज थे चाओ तो मेरो कोढ धो सको हो।” ⁴¹ईशु न बिपै दया आई अर बो बिपै आपको हाथ धर'र खयो, “म चाऊँ हूँ, तू कोढ स निरोगो हो।” ⁴²अर बो कोढी हात्युहाथ ई निरोगो होगो। ⁴³⁻⁴⁴ईशु बिनै चिता'र बोल्यो, “देख तू ई बात क बारा म कोई न ई मना खिज्ये अर याजक क कनै जा'र खुद न दिखा, अर मूसा की रीत गेल जंय्यां मंडेडो ह तेरो कोढ धुपण की गुवाई म तू चढावो चढा।” ⁴⁵पण बो बारनै जा'र सगळाँ म आ बात फिला दि जिसै ईशु बी नगरी म चोडै- धाडै कोनी जा सक्यो। पण बो उजाड म रियो। अर बठै बी लोग च्यारूँमेर हू बिकै कनै आर्या हा।

हवा भेहडा न निरोगो करबो

2 क्युंकि दिना क पाछै ओज्युँ ईशु कफरनहूम म आयो। अर मिनखा न ई बात को बेरो चाल्यो की बो घरा ह। ²अर बी घर क माईनै अर बारनै अत्ता मिनख भेळा होया की बठै तिल धरबा की भी झघा कोनी री। अर ईशु मिनखा न परबचन देर्यो हो। ³अत्ति बारा म ही बठै च्यार मिनख एक हवा भेहडा मिनख न उठार ल्याया। ⁴पण घणी सारी भीड की बजै स बे बिनै ईशु क कनै कोनी लेज्या सक्या। जणा बे अंय्यां कर्या की बे बी कोठा की छात प चढगा अर जठै ईशु हो बठैऊँ बी छात न हठायो अर बे बिनै खाटली प सुवा'र रस्सा क बळ ईशु क कनै लटका दिन्यो ⁵ईशु बाकाळा बिश्वास न देख'र बी हवा भेहडा मिनखँ बोल्यो, “बेटा तेरा पाप धुपगा।” ⁶बी बठै शास्त्रा न सीखावाळा भी बैठ्या हा। बे आप-आपका हिया म सोचबा लाग्या, ⁷“ओ मिनख अंय्यां की बात क्युं बोलै ह। ओ तो परमेशबर की बैजती करै ह, परमेशबर क अलावा किकी मजाल की बो पापा न धो सकै?” ⁸ईशु आपकी आत्मा म जाणगो की बे आपका हिया म काँई सोचर्या ही। अर बो बण स बोल्यो, “थे थारा हिया म ओ काँई सोचर्या हो। ⁹चोखो काँई ह, ई हवा भेहडा न ओ खेणो की तेरा पाप धुपगा। नई जणा ओ खेणो खड्यो हो अर तेरी खाटली उठा'र चाल पड। ¹⁰पण म थानै साँची बोलूँ हू की मिनख का बेटा न ई धरती प पाप धोण को हक हा।” अर ईशु हवा भेहडा मिनख

न बोल्यो, ¹¹“म तनै खेवूँ हू खड़यो होर तेरी खाटली न ले’र तेरै घरा चलयो जा।” ¹²अर बो खड़यो होर तावळो सो आप हाळी खाटली न उठा’र सगळों की आँख्या क आगै ही चलेगो। अंय्यां को काम देख’र बाकै ताजुब होयो अर बे आ बोल’र परमेश्वर की जै-जैका’र करी की, “म्हें अंय्यां को कार कदै ही कोनी देख्या।”

ईशु लेवी न बुलायो

¹³ईशु ओज्युँ गलील दरियाव क किनारै गयो अर भीड़ बी बीकै गेल आरी ही जणा ईशु बानै सीख देबा लाग्यो। ¹⁴अर चालता-चालताई ईशु हलफई का बेटा लेवी न चुंगी चोकी प बैठ्यो देख’र, बिनै बोल्यो, “मेरै गेल आ।” अर बो खड़यो होर बिकै गेल होगो।


¹⁵इकै पाछै ईशु लेवी क घरा जा’र जीमबा लाग्यो। अर बठै बिकै अर बिका चेला क सागै चुंगी लेबाळा अर पापी बी जिमा हा क्युं क अंय्यां का घणक्राक बिकै गेल आग्या हा। ¹⁶आ देख’र फरीसी अर शास्त्रा न सीखाबाळा बिका चेला स बोल्यो, “ईशु पाप करबाळा अर चुंगी लेबाळा क सागै खावै पीवै ह!” ¹⁷ईशु बाकी बातां सुण’र बण स बोल्यो, “निरोगा मिनखा न बैद की जुर्त कोनी होवै। रोगला न ही बैद की जुर्त पडै ह। म धर्मिया ताँई कोनी आयो पण पाप्यां अर अच्छता ताँई आयो हूँ।”

बरत को सवाल

¹⁸एक बर अंय्यां होयो की यूहन्ना अर फरीसीयां का चेला ईशु क कनै आया। अर बा दिना म अंय्यां होतो हो की यूहन्ना अर फरीसीयां का चेला बरत करता हा जणा बे ईशु न बूझबा लाग्या, “यूहन्ना अर फरीसीयां का चेला तो बरत करीं हीं, पण तेरा चेला बरत क्युं कोनी करीं?” ¹⁹ईशु बोल्यो, “कणा अंय्यां होयो हो के बिन्द सागै अर बरात भूखी रहै? जद ताँई बराती बिन्द क सागै ह बे बरत कोनी करीं।” ²⁰पण अंय्यां का दिन बी आबाळा ही जद बनडो बण स दूर कयो जासी बे दिन बाकां बरत करबाळा होसी।

²¹कोई बी पुराणा गाबा प नया सूति गाबा की कारी कोनी लगावै, अर कोई लगा बी ले जणा धोण क पाछै बा नई कारी भेळी होर बि

गाबल्या न दुणो फाड़ गेरै। ²²अंय्यां ही नयो दाखरस पुराणी बखाल ^e (खल्लड़) म कोनी भर्यो जावै क्युं क ज्युं-ज्युं बो उठै जणा बो दाखरस पुराणी बखाल न फाड़गेरै अर दाखरस अर बखाल (खल्लड़) दोन्युं ही खराब हो ज्यावै। ई ताँई नयो दाखरस नई बखाल (खल्लड़) म ही भर्यो जावै हा।”



बखाल (2:22)

अराम हाळै दिन को प्रबु

²³अंय्यां होयो की ईशु अर बिका चेला यहूदीयां का अराम हाळै दिन खेत म ऊँ जाया हा अर चेला चालता-चालता बाळी तोड़बा लाग्या ²⁴फरीसी बानै अंय्यां करता देख'र ईशु ऊँ बोल्या, “देख थारा चेला जो काम अराम हाळा दिन बरजेडो ह बो काम क्युं करीं ही?” ²⁵ईशु बण स बोळ्यो, “थे ओ कोनी बाच्या की जनाडै दाऊद अर बिका साथी-संग्याँ न भूख लागी अर रोट्याँ की जुर्त पड़ी जणा बो के कर्यो? ²⁶बो कंय्यां महायाजक अबियातार क टेम म परमेशबर क मन्दर म गयो अर भेट चढायडि रोट्याँ खाई अर आपका साथी-संग्याँ न भी खुवाई जानै याजक क अलावा कोई न बी खाबा की इजाजत कोनी ही।” ²⁷अर ईशु बण स बोळ्यो, “अराम हाळो दिन मिनखा क भला ताँई बणायो गयो ह मिनख अराम हाळै दिन ताँई कोनी बणायो गयो। ²⁸ई ताँई मिनख को बेटो अराम हाळै दिन को बी प्रबु हा।”

टुंडा मिनख न निरोगो करबो

3 ईशु ओज्युं यहूदीयां का प्रार्थना घर म गयो बठै एक मिनख हो जो टुंडो हो। ²क्युं क मिनख ईशु प दोष लगाबा की ताक म बैठ्या हा। बे देखणो चावा हा की ईशु बी मिनख न अराम हाळै दिन निरोगो करै या कोनी करै। ³ईशु टुंडा मिनख ऊँ बोळ्यो, “मिनखा क मांय खड़यो हो।” ⁴अर ईशु बण स बूझबा लाग्यो, “चोखो काँई ह? अराम हाळै दिन भलो करबो की बुरो करबो?”

^e 2:22 अंगूरा का रस न नया बखाल म घालर धर्यो जातो हो क्युं क जंय्या जंय्या अंगूरा को रस पुराणो होतो बिमै हवा बणती नयो बखाल तो बीके सागै बढतो जातो पुराणा बखाल को काँई बढतो। “अर ओ बखाल चमडा को होतो हो।”

कोई न बचाणो की मारणो?” पण बाकी बोलती बन्द होगी। ⁵ईशु झाळां म भर'र च्यारूमर देख्यो अर बाका हिया न काठो देख'र बो बोळो दुखी होयो। अर ईशु टुंडा मिनख न बोल्यो, “तेरो हाथ आगै करा।” अर बो आपका हाथ न आगै कर्यो अर बिको हाथ चोखो होगो। ⁶इकै पाछै फरीसी बठैऊँ चलेगा अर हिरोद की मानबाळा मिनखा क सागै एक्को कर जाळ रच्यो की ईशु न कंय्यांसिक मारा।

घणी सारी भीड़ ईशु क गेल होगी

⁷ईशु आपका चेला क सागै गलील दरियाव क कनै गयो अर घणी सारी भीड़ बिकै गेल होली ⁸जिमै गलील, यहूदीयां, यरुशलेम, इदुमिया अर यरदन नंदी क परलै नाकै का अर सुर-सैदा क कनै का मिनख हा। अर बे ईशु का कारनामा न जो बो कर्या करतो हो बानै सुण'र बिकै गेल आया हा। ⁹भीड़ बिनै चीथ न सकै ई बजै स ईशु आपका चेला न बोल्यो, “मेरै ताँई एक छोटीसी न्यावडी को जोगाड़ लगाओ।” ¹⁰ईशु बोळा सारा मिनखा न निरोगो कर्यो हो ई ताँई घणा सारा रोगला बिकै हाथ अड़ाबानै बि प पड्यो हा। ¹¹जा मिनखा म ओपरी-बलाय होती बे बिनै देखता ही बिकै पगा म धोक खाता अर ओपरी-बलाय चिलाटि घाल'र खेती, “तू परमेश्वर को बेटो हा।” ¹²पण बो बानै दकाल्तो अर खेतो थे मनै मना दर्शाओ।

ईशु बारा चेला टाळ्यो

¹³ईशु डूंगरी प चढगो अर बो जिनै चावो हो बानै आपके कनै बुलायो, अर बे बिकै कनै गया। ¹⁴बा मऊँ बो बारा न टाळ्यो अर बो बानै आपका प्रेरित' बणायो। ईशु बानै ई ताँई टाळ्यो की बे बिकै सागै सागै चाली। अर बानै बो चोखो समचार सुणाबा ताँई भेज सकै। ¹⁵अर बे ओपरी-बलाय न काढबा को हक बी राख सकीं। ¹⁶जाका नाम अंय्यां हा, शमोन जिको नाम बो पतरस रख्यो ¹⁷जब्दी को बेटो याकूब अर याकूब को भाई यूहन्नो जिको नाम बो बूअनर्गिस रख्यो जिको मतबल “गाज को बेटो” होवै हा। ¹⁸अंद्रियास, फिलीप्पुस, बरतूलमै, मत्ती, थोमो, हलफई हलफई को बेटो याकूब, तद्दै अर

^f 3:13 बे मिनख जानै खास काम के लिए टाळ्यो जावै अर जानै बा कामा न पूरो करबा ताँई खास हक देर भेज्यो जावै।

देश भग्त शमोन ¹⁹अर यहूदा इस्करियोती ओ बोई ह जो ईशु न धोखा स पकड़ायो हो।

ईशु शैतान की शक्ति न कोनी बरतै

²⁰जद बो घरा गयो अर बठै ओज्युँ घणी सारी भीड़ भेळी होगी ई बजै स ईशु अर बीकाळा चेला न रोटी खाबा को बी ओसाण कोनी हो। ²¹जणा ईशु का घरका सुण्या की ईशु बठै आयडो ह जणा बे बिनै लेण ताँणी आया। क्युं क लोग ईशु क बारा म खेता हा इको चित ठिकाणै कोनी। ²²यरुशलैमऊँ आयडा धर्मशास्त्रि खेता हा की, “ईशु क माईनै ओपरी-बलाय को सरदार बालजबूल रळर्यो ह।” क्युं क ईशु बिकी शक्तिऊँ ई ओपरी-बलाय न काढै ह।

²³ईशु बनै बुला'र नीति कथा म खेबा लाग्यो की, “शैतान न शैतान कंय्यां काढ सकै। ²⁴ज कोई राज पाट म फूट पड़ज्या जणा बो राज पाट कंय्यां चाल सकै ह। ²⁵अर घरका क मांय न फूट पड़ज्या जणा बो घर कंय्यां बस्यो रैह सकै ह। ²⁶ज अंय्यां ही शैतान खुद म फूट गेर खुद क सामै खड़यो होज्या जणा बिको राज कंय्यां बण्यो रैह सकै ह? आ ढंगा तो बो तब्बा हो जासी। ²⁷ज कोई तगडा मिनख का घर न लूटणो चावै तो पेल्या बी तगडा मिनख न बाँधणो पड़सी जणा पाछै ही बिको घर लूट्यो जा सकै ह। ²⁸म थानै साँची-साँची खेवूँ हू की मिनखा का सगळाँ पाप उरै ताँई परमेशबर न बुरो भलो कहडो भी धुप सकै ह ²⁹पण जो पवित्र आत्मा न बुरो भलो कहदै बो पाप कदैई धोयो कोनी जा सकै। अर जो अंय्यां को पाप करै बो जुगान्तर को पापी हो ज्यावै।” ³⁰(ईशु आ बात ई ताँई बोल्यो क्युं क बठै खड़्या मिनख बोलर्या हा की इमै ओपरी-बलाय रळरी ह।)

ईशु का भाईडा अर माँ

³¹ईशु की माँ अर भाई बठै आया, अर बारै ही खड़्या हो'र बिनै बुलावो भेज्यो ³²ईशु क च्यारूमेर भीड़ ही बे ईशु न बोल्या, “तेरी माँ अर तेरा भाईडा तनै बारनै बुलावै ह।” ³³ईशु बण स बोल्यो, “मेरी माँ अर भाई कुण ह?” ³⁴ईशु आपकै च्यारूमेर बैठ्या मिनखा न देख'र बोल्यो, “देखो अ मेरी माँ अर मेरा भाई ही। ³⁵जो परमेशबर क कह्या गेल चालै बो ही मेरो भाई-भाण अर माँ ह।”

बीज बोण की नीति कथा

4 दरियाव क किनारै ईशु ओज्युँ सीख देवा लाग्यो। अर बिकै च्यारूमेर घणी सारी भीड़ भेळी होगी। ई बजै स बो दरियाव म खड़ी न्यावड़ी क मांय न बैठगो अर लोग दरियाव किनारै खड़्या होगा। ²ईशु बानै सीखदेवाळी नीति कथा म कई बातां सीखातो हो, अर बो बानै अंय्यां सीखायो की, ³सुणो, “एक बार की बात ह एक किसान हो अर बो बीज बोण ताँई गयो। ⁴अर जद बो बीज बोण लाग्यो, जणा क्युंक बीज गेला क मांय न पड़या अर बानै पन्ध्री चुग लेगा। ⁵अर क्युंक बीज कांकरा म पड़या अर बानै चायै ही बत्ती माट्टी कोनी मिली जि बजै स बे तावळा ही निपज्याया ⁶पण सूरज उगता ही तावड़ीऊँ बळगा क्युं क बाकी जड कोनी फेल पाई। ⁷अर क्युंक बीज झाड़या म जा'र पड़या अर बानै झाड़ी फेल'र दबा दी। ⁸अर क्युंक बीज उपळी माट्टी म पड़या अर उपज्या जिसै खूब पणप्या, अर बण स तीसुणा साठुणा अर सोगुणा पैदावार होई।” ⁹अर ईशु बानै बोल्यो, “जिकै कान ह बो खोलल्यो।”

सीखदेवाळी नीति कथा को मकसद

¹⁰जद ईशु एकलो हो जणा बिकै कनै का मिनख बा बारा चेला क सागै बिनै नीति कथा क बारा म बूझबा लाग्या ¹¹ईशु बानै खेबा लाग्यो, “थानै तो परमेशबर का राज को भेद खोलेडो ह पण दूसरा मिनखा ताँई तो सगळी बातां नीति कथा म ही होवै ह। ¹²जणांई तो,

“देखता-देखता बानै कोनी सुझै अर सुणता-सुणता कोनी सम्बळै अर जणांई तो बे आपका हिया न कु गेलाऊँ कोनी बदळी अर परमेशबर बानै माफ कोनी करै।”

बीज बोण की नीति कथा को खुल्लासो

¹³ईशु बण स बोल्यो, “आ नीति कथा थारै पल्लै कोनी पड़ी जणा बाकी की नीति कथा कंय्यां पल्लै पड़सी? ¹⁴किसान जो उगावै ह बो तो परमेशबर को बचन ह। ¹⁵जो बीज गेला क मांय न पड़या अ बे लोग ह जो बचन सुणै ह पण शैतान आर बी बचन न चुरा ले जावै ह। ¹⁶जो बीज कांकरा क मांय न पड़या

अ बे लोग ह जो बचन न सुणी ही अर बिनै राजी-पेटाऊँ मानी बी ही ¹⁷पण वो बचन बाकै हिया म जड़ कोनी पकड़ पावै जि बजै स जद बापै दुख अर सताव आवै जणा बाको बिश्वास मर ज्यावै ह। ¹⁸जो बीज झाड़या क माईनै बोया गया अ बे लोग ह जो बचन सुणी ¹⁹पण जीण को घ्यार, मो-माया को लालच अर मन की बुरी बातां बाका हिया म ही बचन न दबा देवै ह, ई ताँई बे बीज फळी कोनी। ²⁰अर जो बीज उपळी माट्टी म बोया गया अ बे लोग ही जो बचन सुण'र बिनै मानी ही अर बिकै गेल फळी, जिसै बे तीसुणा, साठुणा, सोगुणा अर सौ गुणाऊँ बी घणो फळ ल्यावीं।”

कुण्डा तळै दिवो

²¹ईशु बण स बोल्यो, “कोइनै दियो जळा'र बिनै कुण्डा अर खाट क तळै म्हेंलता देख्या हा के? पण बिनै आळया म म्हेंली ही जिसै वो सगळौं कोठा न च्याण्णो दे। ²²जो क्युं बी ओला म ह वो चौडा म ल्याओ जासी अर जो क्युं ढकेडो ह बिनै खोल्यो ज्यासी। ²³जिकै कान ह वो खोल ल्यो।”

²⁴वो बण स बोल्यो गोर कर'र सुणज्यो, “जंय्यां थे लोगा क सागै करो हो बंय्यां ही परमेश्वर थारै सागै करसी अर बिसै बी बत्ती करसी। ²⁵जिकन ह बिनै ओर दियो जासी, अर जिकै कनै कोनी बिसै जो क्युं बिकै कनै ह वो भी ले लियो जासी।”

बीज की नीति कथा

²⁶ईशु बोल्यो, “परमेश्वर को राज खेत म बीज बोणिया मिनख की जंय्यां ह। ²⁷अर वो तो रात न सोतो अर दिन म जागतो। अर कद बा बीजा म कुपळ आई अर कद बे बढया बिनै तो काँई बात की खबर ही कोनी पड़ी। ²⁸धरती खुद ही उपजावै पेल्या कुपळ आवै जिकै पाछै बाळी अर बाळया म खूब दाणा। ²⁹अर जद दाणा पक जावै ह जणा वो बेगो सो दातळी ले'र काटबा लागज्या क्युं क लावणी को टेम आ ज्यावै ह।”

राई का दाणा की नीति कथा

³⁰ईशु ओज्युँ बोल्यो, “आपा परमेश्वर का राज न किसै दर्शा सकां हा, अर बिनै की बातऊँ समझा सकां हा? ³¹ओ राई क दाणा की जंय्यां को ह जिनै जमीन म बोयो जावै अर ओ दाणो सगळौं बीजा मऊँ छोटो होवै। ³²पण जद

इनै बोयो जावै जणा ओ दाणो उग'र धरती का सगळाँ बोज्जा मऊँ बडो होज्या ह। इकी डाळ्याँ अत्ति बडी होवै की पंछी वा प घुर्सळो घालै।”

³³अंय्यां की नीति कथा सुणा'र बो बानै बचन सुणाया करतो हो, अर बो बानै बाकी बुद्धि गेल ही सीखातो हो। ³⁴बिना नीति कथा क क्युं ई कोनी सीखातो हो पण जद बो आपका चेला क सागै एकलो होतो जणा बो बानै सगळीं बातां को भेद समझाया करतो हो।

ईशु तौफान न डाळ्यो

³⁵जनाडै आथण्या ईशु चेला न बोल्यो, “आओ ल्यो आपा दरियाव क परलै-पार चालां” ³⁶ई बजै स बे भीड़ न बठै ही छोड़'र ईशु जि न्याव म बैळ्यो हो बी न्याव म ही बिनै ले'र रवाना होया। बठै ओर बी न्यावा ही। ³⁷बाकै रवाना होण क पाछै जोर सूँ तौफान चालबा लाग्यो। अर दरियाव म झाल उठबा लागी अर न्याव क पछाड़ा मारबा लागी अर न्याव म पाणी भरबा लाग्यो। ³⁸पण ईशु न्याव क गेलडै नाकै सुत्यो हो। चेला बिनै जगाया अर बिसै बोल्या, “ओ गुरजी थानै क्युंई परवा कोनी के? म्हें डुब बाळा हा।” ³⁹ईशु खड्यो होर तौफान न दकाल्यो अर झालऊँ बोल्यो, “थम ज्या” अर तौफान थमग्यो अर बठै सक्युं श्यान्त होगो। ⁴⁰अर ईशु बण स बोल्यो, “थे क्यालै डरो हो? थानै हालबी विश्वास कोनी के?” ⁴¹बे डरग्या अर आपसरी म बूझबा लाग्या, “ओ कुण ह? जिको खयो हवा अर पाणी भी मानै हा।”

ईशु नुगरी आत्मा न काळ्यो

5 बे दरियाव क परलै नाकै गिरासेनियो नाम का परदेस म गया, ²ईशु जद न्याव मऊँ उतर्यो जणा बठै एक मिनख मूसाणा मऊँ ईशु क कनै आयो बिकै मांय न नुगरी-आत्मा ही ³बो मूसाणा क मांय न रैहतो हो बिनै कोई भी साँकळाँ कोनी बाँध सक्यो। ⁴क्युं क बिनै बोळी बार साँकळां हू बाँध्या हा पण बो साँकळां न तोड़ देतो अर बानै पीस गेरतो, बिनै कोई भी बस म कोनी कर सक्यो। ⁵बो मूसाणा अर डूंगरा म चिलाटि घालतो भटकतो, अर खुद न भाठाँ मारतो हो।

⁶बो ईशु न परै स देख'र बिकै कनै भाग'र गयो अर बिका पगा म पड़ग्यो ⁷अर बार घालतो बोल्यो, “ओ ईशु परम पीता परमेश्वर का बेटा थारो म्हारो काँई लेण देण? ज मनै दिन घाल्या तो, थानै परमेश्वर की सोगन लागै।” ⁸[क्युं क

ईशु बिनै खयो हो, “हे नुगरी इकै माईऊँ निकळ ज्या।”⁹ अर ईशु बिनै बूझ्यो, “तेरो नाम काँई ह?” बो ईशुऊँ बोल्यो, “मेरो नाम पलटण ह क्युं क म्हें घणी सारी हा।”¹⁰ अर बो ईशुऊँ हाथ जोड़’र अरदास करबा लाग्यो, “म्हानै देश निकालो मना दे।”

¹¹अर बी टेम बठै डूंगर प सुलडा को रेवड़ चरै हो।¹² जणा बा पलटण ह जखी ईशु स अरदास कर’र बोली, “म्हानै तू बामै जाबा दे जिसै म्हें बामै रळज्यावां।”¹³ जणा बो बानै हुकम दिन्या अर बा पलटण ही जखी बि मिनख मऊँ निकळ’र बा सुलडा क मांय न जा रळी। सुलडा करीब दो हजार हा। बे सुलडा डूंगर क उपरऊँ ई गुळ-गञ्जी खा’र दरियाव क मांय न जा’र पड़या अर डुब’र मरगा।

¹⁴बी रेवड़ का गुवाळयाँ जो बा सुलडा न चराता हा बे भाग’र नगरी अर बिकै कनै की ढाणि-ढफाण्या म जा’र ओ समचार सनै खे सुणायो। बठै जो होयो हो बिनै देखण ताँई लोग भेळा होगा।¹⁵ बे ईशु क कनै आर देखया जणा बो मिनख जिमै बे नुगरी-आत्मा ही बो सूल ढंग हू गाबा पेर’र सतूना म बैठ्यो हो। अर बे बिनै देख’र डरग्या।¹⁶ अर बी घटना न देखणिया बा मिनखा न बताबा लाग्या की जिकै मांय न नुगरी-आत्मा ही बिकै सागै अर सुलडा क सागै काँई होयो? ¹⁷लोग ईशुऊँ अरदास करबा लाग्या की तू अठैऊँ चल्यो जा।

¹⁸जणा ईशु न्याव म चढबा लाग्यो जणा बो मिनख जिमै पेल्या नुगरी-आत्मा ही ईशुऊँ अरदास करबा लाग्यो, “मनै बी तेरै सागै ले चाला।”¹⁹ पण ईशु बिनै नट्यो अर बिनै बोल्यो, “तेरा घरा जा अर तेरा मिनखा न अ सगळी बातां बता जो प्रबु तेर ताँई कर्यो ह। अर बानै अंग्यां बी बता की प्रबु कंग्यां सिक तेर प दया करी ह।”²⁰ अर बो मिनख चलेगो अर दस नगर्या म जा’र बठै का मिनखा न बताबा लाग्यो की ईशु बी ताँणी कितनो बडो चमत्कार कर्यो ह। ई काम की बजै स मिनखा न ताजुब होयो।

मरेडी छोरी अर रोगली लूगाई

²¹ईशु ओज्युं दरियाव पार कर किनारा प हो जद ही बिकै च्यारूमेर घणी सारी भीड़ भेळी होगी।²² जणा यहूदी प्रार्थना घर का सरदारा म स एक जणो जिको नाम याईर हो बठै आयो अर बो ईशु न देख्यो अर बिकै पगा पड़’र²³ अरदास करतो बोल्यो, “मेरी नानी छोरी मरबाळी ह, म तेरें हाथ जोड खेवूँ हू मेरै सागै चाल’र तेरो हाथ बिपै धर दे जिसै बा बच ज्यावै।”²⁴ जणा ईशु

बिके सागै चाल पड़्यो अर घणी सारी भीड़ बी बिके गेल होली। अर लोग बिपै टूट'र पड़े हा।

²⁵बामै एक लूगाई ही जो बारा बरसा हू लोय भेबा का रोग हू दुखी ही ²⁶बा सगळौं जतन कर देखली अर भाँत भाँत का बैदा की दवाई ले'र देखली पण भापड़ी क क्युं ई अराम कोनी हो। अर जो क्युं बिके कनै पूण पावलो हो वो बी ई बिमारी की दवा-दारुँ म बोया बैठी ही। पण बिकी हालत घणी खराब होगी। ²⁷⁻²⁸जद बा ईशु क बारा म सुण्यो बा भीड़ क माईऊँ ईशु क गेल आई, क्युं क बा आपका हिया म ध्यार राखी ही, “ज म ईशु का गाबा की कोर क हाथ अड़ा द्युँ तो म निरोगी हो ज्याउंगी।” अर जंय्याई बा बिका गाबा क हाथ अड़ायो। ²⁹बिको हात्युहाथ लोय बहणो बन्द होगो अर बा आपकी काया म जाणगी की म निरोगी होगी हू। ³⁰अर जद की जद ईशु न बी लाग्यो की बिके माईऊँ शक्ति निकळी ह। ईशु गेल न मुड़'र बूझबा लाग्यो, “मेरा गाबा क कुण हाथ अड़ायो ह?” ³¹जणा ईशु का चेला बिनै बोल्यो, “तू देखर्यो ह की भीड़ तनै च्यारूमैर स दबाया जा री ह। अर तू बूझै ह की थारै कुण हाथ अड़ायो?” ³²पण ईशु च्यारूमैर देखतो रियो की अंय्यां को काम कुण कर्यो ह। ³³बा लूगाई जाणती ही की बिके सागै काँई होयो ह? बा डरती - डरती आई अर ईशु क पगा म पड़'र सगळी बातां साँची-साँची बता दी। ³⁴अर ईशु बिनै बोल्यो, “बेटी तेरो बिश्वास तनै बचायो ह, सुखऊँ चली जा अर बिमारी स बची रैहा।”

³⁵बो अंय्यां बोल ही रियो हो अत्तामई यहूदी धर्म सभा भवन का अधिकारी क घराऊँ लोग आया अर बे याईरऊँ बोल्यो, “इब गुरु न दिन मना घालो क्युं क थारी छोरी तो चलती री।” ³⁶ईशु बाकी बातां न सुण्यो अर याईरऊँ बोल्यो, “डरै मना बस तू तो बिश्वास राखा।” ³⁷अर ईशु बठै सगळौं न छोड़ आपकै सागै पतरस, याकूब अर याकूब का भाई यूहन्ना न ले'र ³⁸याईर क घरा गयो। अर बठै देख्यो की लोग जोर-जोर सँ बार घोड़ो मचा राख्यो हे। ³⁹बो मांय न गयो अर बण स बोल्यो, “थे क्युं बार- तोबा मचाओ हो? छोरी तो मरी कोनी पण सुत्ती हा।” ⁴⁰बिकी ई बात न सुण'र लोग बिको तमासो करबा लाग्या। पण ईशु मिनखा न बारै काढ'र छोरी का माँ-बाप अर आपका चेला न सागै ले'र बठै गयो जि कोठा म छोरी ही। ⁴¹ईशु छोरी को हाथ पकड़्यो अर बोल्यो, “तलीता कूमी! (इको मतबल ह नानी छोरी) म तनै बोलूँ हूँ खड़ी हो ज्या।” ⁴²अर बा नानी छोरी तावळीसी खड़ी होगी अर अठिन बठिन चालबा-फिरबा लागी। (बा छोरी बारा बरस की ही।) बे बिनै देख'र ताजुब म पड़गा। ⁴³ईशु

क सागै जो हा बानै बो चिता'र हुकम दिन्यो की ई बात क बारा म किनैई मना खिज्यो अर बो बोल्यो, "ई छोरी न खावा ताँई किमी द्यो।"

नासरत म ईशु को निरादर

6 इकै पाछै ईशु बी झघै न छोड़'र आपकी नगरी क मांय न गयो। बिका चेला बी बिकै सागै हा। ²यहूदीयां का अराम हाळै दिन ईशु यहूदीयां का प्रार्थना घर म गयो अर बठै परबचन सिखावा लाग्यो। ईशु को परबचन सुण'र लोग ताजुब म पडगा। बे बोलबा लाग्या, "इकै कनै अ बातां कठैऊँ आई। अर इनै ओ कुणसो ज्ञान देयडो ह, अर ओ बडा-बडा चमत्कार कंय्यां करै ह? ³के ओ बोई खाती कोनी के? जो मरियम को बेटो अर याकूब, युसफ, यहूदा अर शमोन को भाईडो ह। इकी भाणा आपणै सारई कोनी री के?" ई बजै स बै लोग ईशु की कोनी सुणी। ⁴ईशु बण स बोल्यो, "परमेश्वर की खेबाळा (नबी) को निरादर आपका खुद की नगरी, रिस्तेदार अर कुणवा न छोड़'र कठै ही कोनी होवै।" ⁵अर बो बठै क्युंई चमत्कार कोनी कर सक्यो। पण क्युं क सा बिमारा प हाथ धर'र बानै ठिक कर्यो। ⁶ईशु न बाका अबिश्वास प ताजुब होयो अर बो कनै का गाँवा म जातो अर सीखातो रियो।

ईशु आपका बारा चेला भेज्यो

⁷ईशु आपका बारा चेला न आपकै कनै बुलायो। अर बो बानै दो-दो जणा न बारै भेजबा लाग्यो अर बो बानै ओपरी-बलाय प हक दियो। ⁸अर बानै हुकम दियो, "थे थारी लाठी न छोड़'र किमि बी सागै मना लियो न रोटी, न झोळी अर न बटवा म रीपया ⁹थे लीतरा तो पेरल्यो पण दुजो कुर्तो सागै मना लियो। ¹⁰जिकै बि घरा थे जाओ बठै ई बासो लेता रियो जद ताँई थे बी नगरी म रेहवो। ¹¹अर कोई गाँव अर नगरी म थारी आवभगत न होवै तो थे बी नगरी अर गाँवऊँ बारै चल्या जायो अर बण क खिलाफ बानै चिताणा ताँई थे थारै लीतरा की धुळ बी बठै हि झाड़ दिज्यो।"⁹ ¹²अर बे बठैऊँ जा'र पापाऊँ हिया फिराबा को हैल्लो पाड्यो। ¹³अर बे घणी सारी ओपरी-बलाय निकाळी अर घणा सारा रोगला न जैतून को तेल लगा'र (अबिषेक) निरोगा कर्या।

⁹ 6:11 आ ई बात की निशाणी ह की अंय्यां करके चेला बणको इंकार करीं हीं।

बतिस्मा देबाळा यूहन्ना की हत्या

¹⁴राजा हेरोदेस^h ईशु क बारा म सुण्यो, क्युं क ईशु की बातां सगळी झघै फेलगी ही। कई मिनख बोलता हा की बतिस्मो देबाळो यूहन्नो मरेडा म स जीगो हा। ई बजै स बिकै मांय न चमत्कारी शक्ति काम करै हा। ¹⁵पण कई बोलता हा की 'बो एलियो' हा' अर कई बोलता हा की 'ओ कोई पुराणा टेम को परमेश्वर की खेबाळा की जंय्यां को एक हा' ¹⁶पण हेरोदेस बिकै बारा म सुण्यो तो बो बोल्यो, "ओ तो यूहन्नो ह जिको सिर म कटवायो हो ओ ओज्युं स जिन्दो होगो।" ¹⁷हेरोदेस राजा खुद का सीपाईडा न भेज'र बिनै बन्धा'र कोठडी म गीरवा दिन्यो। अर हेरोदेस राजा खुद का भाई फिलीप की घरहाळी जिको नाम हिरोदियास हो बिकै सागै बो ब्याह कर लियो। ¹⁸ई बजै स यूहन्नो हेरोदेस न कहतो हो, "तू जो अंय्यां को काम कर्यो ह ओ ठिक कोनी ह। की तू तेरा भाई की लूगाई न ब्याली ह।" ¹⁹ई बजै स हेरोदिया यूहन्ना स बैर राखबा लागी। अर चावती ही की यूहन्नो मार्यो जाय। पण बा बिनै मार कोनी सकीं। ²⁰क्युं क हेरोदेस राजा यूहन्ना स डरतो हो। अर जाणतो हो की यूहन्नो एक खरो अर धर्मी मिनख ह। ई बजै स बो बिकी रुखाळी करतो हो। अर हेरोदेस यूहन्ना की बातां न सून'र बोळो घबरातो हो। इकै पाछै म बी बिनै यूहन्ना की बातां चोखी लागती ही।

²¹कुदरती हिरोदियास क हाथ अंय्यां को मौको लाग्यो की एक दिन ओ हेरोदेस राजा खुदका जलमदिन प दरबारिया न, सेनापत्तियां न अर गलील का मान्यां-थान्यां मिनखा न बुलायो। ²²बी दिन हिरोदियास की छोरी (बेटी) बठै आई अर नाच'र, जीमबा आया सगळाँ मिनखा न अर राजा हेरोदेस न राजी कर दी। ई बजै स राजा बिनै बोल्यो, "माँग तू काँई चावै ह जो तू माँगसी म तनै देस्युं।" ²³बो बचन देर बिनै बोल्यो, "तू माँग! ज तू मेरो आदो राज-पाट बी माँगसी तो म तनै दे देस्युं।" ²⁴अर बा आपकी माँ क कनै गई अर बिसै बूझबा लागी, "मनै के माँगणो चाए?" बिकी माँ बिनै बोली, "यूहन्ना बतिस्मो देबाळा को सिरा।" ²⁵अर बा तावळीसी भाग'र राजा क कनै गई अर बा राजाऊँ

^h 6:14 हैरोद अन्तिपास जो गलील को राजा हो अर महाधिराज हिरोद को बेटो हो

ⁱ 6:15

ओ एक अंय्यां को मिनख हो जो ईशु का टेम हू सेकड़ो बरसा पेली परमेश्वर की खेबाळो होयो हो।

बोली, “मनै यूहन्ना बतिस्मो देवाळा को सिर कटवा’र थाळी म धर’र इब की स्यात दियो जाया।” ²⁶ई बात न सुण’र राजा बोळो दुखी होयो। पण हेरोदेस राजा होण क नातै आपकी जुवान अर म्हेंमाना की बजै स बो आपकी बेटी न मना कोनी कर सक्यो। ²⁷अर राजा एक जल्लाद न हुकम दियो की बो यूहन्ना को सिर काट’र ल्यावै। ²⁸अर बो जल्लाद कोठडी क मांय न गयो अर यूहन्ना को सिर काट’र, बिनै थाळी क मांय न धर’र बी छोरी न दियो। अर बा छोरी बिनै आपकी माँ न देदी। ²⁹अर यूहन्ना का चेला जद ई बात क बारा म सुण्या तो बे बठै गया अर यूहन्ना की लाश (शव) ले’र आया अर बिनै एक कबर क मांय न धर दी।

चेला को ओज्युँ स आणो अर सुनसान झधै म जाणो

³⁰प्रेरित भेळा होर ईशु क कनै आया। अर जो क्युं बै कर्या अर सिखाया हा बिनै सक्युं खेसुणायो। ³¹बाकै कनै मिनखा को तांत्यो लागर्यो हो। अर बानै रोटी खाबा को बी ओसाण कोनी हो। ई बजै स ईशु बण स बोळ्यो, “आओ ल्यो आपा कोई उजाड़ म जा’र अराम कर ल्याँ।” ³²बे न्याव म चढर उजाड़ म चलेगा।

पाँच हजार मिनखा को पेट भर्यो

³³बानै जाता देख लोग बानै पीछाणगा अर सगळी नगर्या का मिनख भेळा हो’र भाग’र बिकै अगाऊ बठै पूँचगा। ³⁴जद ईशु न्याव स तळै उतर्यो जणा बिनै घणी सारकी भीड़ दिखी अर बो बापै तरस खायो। क्युं क बे बा (भेड्यां) ललंडियां की जंय्यां हा, जाको गुवाळ्यो कोनी होवै। अर ईशु बानै घणी सारकी बातां सिखाबा लाग्यो।

³⁵अर जद दिन आथबा लाग्यो जणा ईशु का चेला बिकै कनै आर बोळ्या, “आ तो उजाड़ ह अर मोड़ो भी बोळो होगो। ³⁶ई ताँणी तू आ मिनखा न बिदा कर दे जिसै बे कनै का गाँव बस्तियाँ म जा’र खुद ताँई रोटी मोल ले सकीं।” ³⁷बो बण स बोळ्यो, “थे ही आनै खाबा ताँई द्यो।” बे बिसै बोळ्या, “के म्हें दो सौ दिनारा/ की रोटी मोल ले’र आवां अर बानै खुवावां?” ³⁸ईशु बण स बोळ्यो, “जाओ अर देखो थारै कनै कत्तीक रोटी हा।” अर बे बेरोपाड़र बिनै बताया की

/ 6:37 दो सौ दिनार को मतबल होवै ह लगभग आठ मन्हा की मजदुरी

म्हारै कनै पाँच रोटी अर दो मछीयां ह। ³⁹अर बो बानै हुकम दियो की सगळाँ न घास प पंगत म बिठा द्यो। ⁴⁰अर बे सौ-सौ की अर पच्चास-पच्चास की पंगता बणार बैठगा। ⁴¹ईशु पाँच रोटी अर दो मछी न हाथ म लियो अर ईश्वर नगरी कानी देख'र परमेश्वर को धनेवाद कयो, अर बिकै पाछै बो रोट्याँ ली अर रोट्याँ का टुक-टुक कर चेला न देतो गयो, जिसै बे मिनखा न जिमा सकै अर बा दो मछीयां न बी बा सगळाँ म बाट दि। ⁴²सगळाँ जणा खा'र धापगा। ⁴³बिकै पाछै बी रोटीयां अर मछियांऊँ भरेडा बारा चोल्या बचगा। ⁴⁴रोटी खाबाळा म पाँच हजार तो मोट्यार-मोट्यार हा।

ईशु पाणी प पगा चाल्यो

⁴⁵ईशु चेला न बोल्यो की तावळा सा न्याव म चढ ज्यावो अर बैतसैदा जो दरियाव क परलै नाकै ह बठै मेरँ अगाऊँ पूँचो अर म आनै बिदा कर'र आऊँ हूँ। ⁴⁶बानै बिदा कर'र ईशु डूंगर प प्रार्थना करबा चलेगो। ⁴⁷अर दिन आथगो, न्याव दरियाव क बीच म ही, जद ईशु जमीन प एकलो हो। ⁴⁸अर ईशु देख्यो की चेला न्याव चलाता-चलाता सांस फुलगा ही। क्युं क सामै की भाळ चालरी ही ईशु भागपाट्या दरियाव प चालतो होयो बाकै कनै आयो अर बो बण स अगाऊँ जाणो चावहो। ⁴⁹पण बे बिनै दरियाव प चालतो देख'र बिचार्या, “ओ तो भूत ह” अर बे कुकबा लाग्या। ⁵⁰क्युं क बे सगळाँ बिनै देख'र डरग्या। पण ईशु तावळो सो बण स बातां कयो अर बोल्यो, “ढाढस बाँधो, म हूँ, डरपो मना।” ⁵¹अर बो बाकै कनै न्याव प गयो अर भाळ थमगी अर बे ताजुब करबा लाग्या। ⁵²अर बाकै रोटीयां क चमत्कार क बारा म बी कोनी पल्लै पडी क्युं क बाकी मती बँधरी ही।

गन्नेसरत म रोगला न निरोगो करबो

⁵³अर बे दरियाव न पार कर गन्नेसरत म पुचर बठै ही न्याव न बाँध दी। ⁵⁴अर न्यावऊँ उतर ताँई लोग बिनै पीछाणगा। ⁵⁵अर सारै की बस्तियाँ म भाग'र गया अर बठैका मिनखा न बताया बे रोगला न खाटल्या म घालर बिकै कनै ल्याया। ⁵⁶ईशु जि गाँव, नगरी अर बस्तियाँ म जातो हो लोग बठैई रोगला न बजारा म ल्यार बिसै अरदास करता हा की बो बानै आपका गाबा की कौर क हाथ अडाबा दे अर जत्ता बी बिकै हाथ अडाता हा बे निरोगा हो ज्याता हा।

रिती-रीवाज न निभाणो

7 फरीसी अर शास्त्रा न सीखाबाळा जो यरुशलेमऊँ आया हा अर बे ईशु क कनै भेळा होया ²अर बे ईशु का चेला न हाथ धोया बिना रोटी खाता देख्या। ³(फरीसी अर सगळों यहूदी आपका बढका की लीक पीट्या करता हा, अर बे बिना हाथ धोया रोटी कोनी खाता हा। ⁴अर बे बजार म जा'र आता तो बी बिना न्हाई-धोई करै रोटी-टुक कोनी खाता। अर आ बातां न छोड'र ओर बी बोळी बातां ही जिनै बे निभाता हा, जंय्यां लौटा, घडा अर तांबा का भांढा न धोणो अर माँजणो।) ⁵ई बजै स बे फरीसी अर शास्त्रा न सीखाबाळा ईशु न बूझ्या, “थारा चेला क्युं बढका (पूर्वजो) का रिती रीवाज प कोनी चालै, अर सूल हाथ धोया बिना ही रोटी खावै ह?” ⁶ईशु बण स बोल्यो, “यशयाह नबी थारा जंय्यां का दोगला मिनखा ताँई परमेश्वर कानीऊँ ठिक ही बोल्यो हो। जंय्यां मंडर्यो ह,

‘अ लोग होठाऊँ तो मेरो मान करीं ही पण आको हियो मेरऊँ दूर ह। ⁷अ बेकाम ही मनै ध्यारी ही। अर मिनखा का बणायडा नियमा न मेरा करके सिखावी हीं।’

⁸थे परमेश्वर का हुकम न टाळके मिनखा का रिती-रीवाजा न मानो हो। ⁹थे बोळा चतर हो जो परमेश्वर का हुकमा न टाळर थाकाळा रिती-रीवाजा न मनवाबाळा हो। ¹⁰जंय्यां मूसा खियो ह,

‘थे थारी माँ अर बाप की इज्जत करो, अर कोई बी मिनख आपकी माँ अर बाप को बुरो करै बिनै मार देणो चायै।’

¹¹पण थे मिनखा न अंय्यां सिखार्या हो की जद थारा माँ-बाप थारै कनैऊँ कोई चिज माँगै तो थे बानै बोलो हो की बा तो कोर्बान^k ह, (जिक्को मतबल परमेश्वर न चढाएडी ह)। अंय्यां बोलर थे थारा माँ-बापा की सेवा करबा स बरी हो ज्यावला। ¹²अर थे अंय्यां सिखा'र मिनखा न बा का माँ-बापा की सेवा कोनी करबा द्यो ¹³अर थे अंय्यां का रिती-रीवाजाऊँ जो थारा बणाईडा हीं आनै निभाण ताँई परमेश्वर का बचन न टाळ द्यो हो। अर अंय्यां-अंय्यां का ओर बी घणा सारा काम ह जो थे करो हो।”

^k 7:11 जिक्को मतबल परमेश्वर न चढाएडी चिज ह अर इनै बो बरत बी सके ह।

7:7 यशयाह 29:13 7:10 निर्गमन 20:12, 21:17

मिनख न सुगलो करबाळी बातां

¹⁴ईशु ओज्युं भीड न बुलायो अर बो बोल्यो, “थे सगळां मेरी सुणो अर समझो। ¹⁵अंय्यां की कोई बी चिज कोनी ह जो मिनख न बारैऊं बिकै मांय जा’र बिनै सुगलो करै ¹⁶[पण जो चिजा मिनखा क माईऊं निकळै ह बे बिनै सुगलो करै ह। जिकै सुणबा ताँई कान हो बो सुण ले।]” ¹⁷अर ईशु भीड न बठैई छोड’र घर क मांय न गयो अर बिका चेला बिनै ई नीति कथा क बार म बूझबा लाग्या। ¹⁸ईशु वण स बोल्यो, “के थारै बी कोनी पल्लैपडी? के थे कोनी जाणो की जखी चिज बारैऊं मिनख क मांय न जावै ह बा बिनै सुगलो कोनी करै। ¹⁹बे चिजा हिया म कोनी जावै पण पेट क मांय न जावै अर निकळ जावै ह।” अर बो अंय्यां बोलर खाबाळी सगळी चिजा न शुद्ध बताओ। ²⁰पाछै ईशु बोल्यो, “मिनख हियाऊं जो बिचारै ह बो बिनै सुगलो करै ह। ²¹मिनख क हियाऊं बुरा-बुरा बिचार, कुकर्म, चोरी, हत्या, ²²व्यबिचार^m, लोभ, कमीणो-पुणो, दोगलोपुणो, ठगणो, बेहूदोपुणो, बळोकडोपुणो, कोई ताँई बुरो बोलबो, गुमान अर गोबुपुणो (मोथोपुणो) बारै निकळै ह। ²³अ सगळी बुरी-बुरी बातां मिनख क माईऊं निकळर बिनै सुगलो करै ह।”

सुरुफिनीकी जात की लूगाई को बिश्वास

²⁴ईशु बी झघा न छोड’र सुर नाम की नगरी म एक घर क मांय न गयो। अर बो चावै हो की बिकै आबा को बेरो कोई न ही न पडै, पण बो छापळ कोनी सक्यो। ²⁵ईशु क बारा म सुण’र एक लूगाई जिकी छोरी म ओपरी-बलाय ही बठै वेगीसी आर ईशु का पगा म पडगी। ²⁶आ लूगाई यूनानी हि अर इको जलम सिरीया क फिनीकी परदेस म होयो हो, आनै यहूदी अछूत मानता हा। बा लूगाई ईशुऊं अरदास करती बोली मेरी छोरी मऊं ओपरी-बलाय काढ दे। ²⁷ईशु बी लूगाई स बोल्यो, “पेल्या टाबरा न धापबादे, टाबरा की रोठ्यां न गण्डकडा क आगै बगाणो चोखो कोनी।” ²⁸बा लूगाई ईशुऊं बोली, “प्रबु थाकाळी भी साँची ह पण टाबर की रोटी का बिखरेडा माखणा गण्डकडा ही तो खावी ही।” ²⁹ईशु बिकी बात न सुण’र बिसै बोल्यो, “तेरी ई बात की बजै

¹ 716 पुराणी पौथी म आ बात कोनी।

^m 7:22 ब्याह करै पाछै बिराणी लूगाई अर मोट्यार क सागै गंदो काम करनो व्यबिचार ह।

स थाकाळी छोरी क माईऊँ ओपरी-बलाय कढगी ह, इब तू राजी-खुशी जा।”
³⁰अर बा लूगार्ई घरा जा’र आपहाळी छोरी न देखी की, बिमै स ओपरी-बलाय कढगी अर बा खाट म आडि होरी ही।

बोळा अर काबा को निरोगो होणो

³¹ईशु सुर नाम की नगरी स बिदा होर, सैदाऊँ दस नगरी होतो होयो गलील दरियाव क कनै पूँचगो। ³²जणा लोग एक बोळा न जो काबो बी हो ईशु क कनै ल्याया। अर ईशुऊँ अरदास कर’र बोल्या, “ईशु थे थारो हाथ इपै धरदयो।”
³³ईशु बी बोळा न भीडऊँ नाकै लेगो अर आपकी आँगळ्यां बिकै काना म घाल्यो अर थुँकर बिकी जीब क हाथ अड़ायो। ³⁴अर ईशु ईश्वर नगरी कानी देख’र दयाऊँ भर्र सांस खिंची अर बिसै बोल्यो, “इप्फथा” इको मतबल ह, “खुल ज्या”। ³⁵अंय्यां बोलता ही बिका कान खुलगा अर जीब की आँट्टी भी खुलगी अर बो चोखा ढंगऊँ बोलबा लाग्यो। ³⁶अर ईशु बानै हुकम दियो की थे ई बात क बारा म किनैई मना खिज्यो। पण बो बानै जत्तो ना बताण ताँई बोल्यो हो, बे बिसै बी घणी बी बात न फैलाई। ³⁷लोग ताजुबकर बोलबा लाग्या, “ईशु भलो-भलो ही करै, अठै ताँणी की बो बोळा न सुणबा अर गुंगा न बोलबा की शक्ति देवै ह।”

च्यार हजार मिनखा को पेट भर्यो

8 वा दिना म एक बार ओज्युँ ईशु क कनै घणी सारी भीड भेळी होई। अर बाकै कनै खाबा ताँई क्युँई कोनी हो। ई बजै स ईशु आपका चेला न बुलायो अर बा न बोल्यो, ²“मनै आपै दया आरी ह क्युं क अ मिनख तीन दिनाऊँ मेरै सागै ही अर आकै कनै खाबा ताँई क्युँई कोनी।” ³अर म आनै भूखा न ही घरा भेजुँ तो अ गेला म ही आक्ता होर बठै ही गोडा टेक दिंगा। क्युं क कई तो बोळी दूरऊँ आईडा ही।” ⁴चेला ईशु न बोल्या, “ई उजाड़ म म्हेँ रोटी कठैऊँ ल्यावां, जिसै आको पेट भर सकां।” ⁵ईशु बण स बूड्यो, “थारै कनै कत्तीक रोट्याँ ही?” बे बोल्या, “म्हारै कनै सात रोट्याँ ही।”

⁶ईशु भीड न हुकम दियो थे पंगत बणार बैठ ज्यायो। अर ई क पाछै ईशु बा सात रोट्याँ न हाथ म ले’र परमेश्वर न धनेवाद देर बा रोट्याँ का टुक कर-कर आपका चेला न देतो गयो अर चेला भीड न परोसता गया। ⁷बाकै कनै थोड़ी सीक मछी बी ही ईशु बानै बी लियो अर परमेश्वर न धनेवाद देर चेला न

दियो अर चेला मिनखा न देता गया।⁸बे सगळों खा'र धापगा अर चेला रोट्याँ स भरेडा सात चोल्या बठैऊँ उठाय।⁹बठै करीब च्यार हजार मिनख हा¹⁰इकै पाछै ईशु बानै बठैऊँ बिदा कर्यो। अर खुद आपका चेला क सागै न्याव म चढर दलमनूता दिसावर चलेगो।

फरीसी ईशु स ईश्वर नगरी की निशाणी माँगी

¹¹फरीसी ईशु क कनै जा'र बिसै जिदबा लाग्या तू असल म ही परमेश्वर कानी स भेजेडो ह तो म्हानै ईश्वर नगरी की कोई निशाणी⁷ दिखा। क्युं क बे ईशु न फसाणो चावै हा।¹²ईशु बाकी ई बात न सुण'र आपकी आत्मा म जोर स आह भर'र बा ऊँ बोल्यो, “ई पीढी का लोग चमत्कार क्युं माँगे ह? आनै ईश्वर नगरी को कोई निशाण (चिन्ह) कोनी दियो ज्यासी।”¹³इकै पाछै वो बानै छोड'र ओज्युँ स न्याव प चढगो अर दरियाव क परलै नाकै चलेगो।

फरीसीयां अर हेरोदेस को खमीर

¹⁴चेला आपकै सागै खमीर हाळी रोटी लेणो भुलगा पण बाकै कनै न्याव म एक ही खमीर हाळी रोटी ही अर इनै छोड'र बाकै कनै खाबा ताँई क्युंई कोनी हो।¹⁵ईशु बानै चितार बोल्यो, “थे फरीसीयां अर हेरोदेस का खमीर⁰ ऊँ बचरिज्यो।”¹⁶चेला आपसरी म ताणा-कसी करबा लाग्या की ईशु आ बात ई ताँई बोलै ह क्युं क आपणा कनै खमीर हाळी रोटी कोनी ह।¹⁷ईशु बाकी ई बात न भापगो अर बण स बोल्यो, “थे आपसरी म अंय्यां क्युं सोचो हो की म्हारै कनै खमीर हाळी रोटी कोनी ह? थारै हालबी क्युंई कोनी पल्लै पडी? थारी मती क्युं बँधगी।¹⁸थारै आँख्या होता सोता बी थानै कोनी सुझै?अर थारै कान होता सोता बी थानै कोनी सुणै? थानै क्युंई याद कोनी? ¹⁹जनाडै म पाँच हजार मिनखा न पाँच रोटीऊँ खुवायो हो बी दिन थे रोट्याँ स भरेडा कत्ता चोल्या उठाय हा?” अर बे ईशु न बोल्यो, “बारा चोल्या।”²⁰“अर जनाडै म च्यार हजार मिनखा न सात रोट्याँ स धपायो हो बी दिन थे रोट्याँ स भरेडा कत्ता चोल्या उठाय हा?” बे बोल्यो, “सात चोल्या।”²¹ईशु बण स बोल्यो, “थारै हालबी पल्लै कोनी पडी के?”

⁷ 8:11 ईश्वर नगरी को कोई बडो चमत्कार

⁰ 8:15 खमीर बाका दोगलापुणा न दिखावै हा।(रोट्याँ न फुलाबा ताँई आटा म गैरबा की चिज।)

ईशु आन्धा की आँख्या खोली

22बे बैतसैदा पूँचगा अर बठै लोग एक आन्धा न ईशु कनै ल्याया अर ईशु स अरदास करता बोल्यो बिपै हाथ धरदे। 23ईशु बी आन्धा मिनख को हाथ पकड़यो अर बिनै गाँव क बार न लेगो। अर बिकी आँख्या म थुक्यो अर आपका हाथ बिपै धर्यो अर इकै पाछै बिनै बूझ्यो, “तनै क्युं सुझै ह के?” 24बो बोल्यो, “मनै हाल तो धुन्दो-धुन्दो सुझै ह। मनै मिनख चालता दरखता की जंय्यां सुझी ही।” 25ईशु ओज्युँ स बिकी आँख्या प हाथ धर्यो जणा बो गोर कर'र देख्यो अर पाछै बिनै सूल सूझबा लाग्यो। अर बो सगळी चिजा न सुल्या ढंग स देखबा लाग्यो। 26बो बिनै आ खेर घरा भेज्यो, “गाँव म मना जाऐ।”

पतरस बोल्यो ईशु ही मसी ह

27ईशु अर बीकाळा चेला कैसरिया फिलीप्पी गाँव म जाया हा गेला म ईशु बानै बूझ्यो लोग मनै काँई खेवीं ही, “म कुण हूँ।” 28बे ईशु न बोल्यो, “कई तो थानै बतिस्मो देबाळो यूहन्नो अर कई एलियो अर कई परमेशबर की खेबाळा म स एक समझी ही।” 29ईशु बण स बोल्यो, “थे मनै काँई समझो हो?” पतरस बोल्यो, “थे मसी^१ हो।” 30ईशु बण स बोल्यो, “थे ई बात क बारा म किनैई मना खिज्यो।”

ईशु आपकी मोत क बारा म चेला न बताओ

31ईशु आपका चेला न बताबा लाग्यो की मिनख का बेटा न दुख उठाणो ह। बो बोळो दुख उठावगो अर बढका, प्रधान याजक अर शास्त्रा न सीखाबाळा बिनै तजसी अर जिकै पाछै बो मार्यो जासी। पण बो तीसरा दिन मरेडा म हू जिज्यावैगो। 32अंय्यां बोलर ईशु आपका चेला न खुद क बारा म सगळी बातां साँची-साँची बता दिन्यो। जणा पतरस ईशु न एकला म लेगो अर ईशु न दकाल्यो। 33पण ईशु पाछो मुडर आपका चेला न देख्यो अर पतरस न दकाल'र बोल्यो, “शैतान मेरे सामैऊँ चल्यो जा। तू परमेशबर कानीऊँ कोनी सोचै पण मिनखा की बातां सोचै ह।”

^१ 8:29 परमेशबर को टाळेडो खास, बचाबाळो, जिनै यहूदी मिनख उडिका हा।

ईशु क पीछे चालबा को मतबल

³⁴ईशु आपका चेला अर भीड़ न आपकै कनै बलार बानै बोलबा लाग्यो, “ज कोई मेरै गेल आणो चावै ह बो खुद न तजर, आपकी सूळी⁹ उठार मेरै गेल हो ले। ³⁵जो बी आपको पीराण बचाणो चावै ह बो आपका पीराणा की हानि उठासी। अर जखौ बी मेर ताँई अर चोखो समचार ताँई आपका पीराण तजसी, बो बिनै बचासी। ³⁶कोई मिनख आपका पीराणा की हानि उठार सगळौ जगत न जीत ले तो बिनै काँई फायदो? ³⁷कोई चीज क बदला म मिनख खुद का पीराण दे सकै ह के? ³⁸ईशु बण स बोल्यो जखौ बी ई पापी अर साँचा परमेश्वर न कोनी ध्यार बाळी पीढी म मेर स अर मेरा बचना स मूंडो फेरगो तो मिनख को बेटो बी जद बो पवित्र ईश्वर नगरी दूता क सागै अर आपका बाप की महिमा म आसी जणा बो बी बा मिनखा स मूंडो फेर लेसी।”

9 ईशु बण स बोल्यो, “म थानै साँची खेवूँ हूँ, अठै खड्या मिनखा म स कई-कई तो अंय्यां का ह की बे जद ताँई परमेश्वर का राज न बिकी शक्ति क सागै न देखले जद ताँई बानै मोत कोनी आसी।”

ईशु को रूप चमकबा लाग्यो

²छः दिना क पाछै ईशु पतरस, याकूब अर यूहन्ना न सागै लियो, अर एकला म बो बानै ऊँचा सारा डूंगर प लेगो। बठै बाकै सामै ईशु को रूप बदळ्यो गयो ³अर ईशु का गाबा चमकबा लाग्या अर अंय्यां का धोळा होया क भळका मारै लाग्या। ⁴ईशु क सागै एलीया अर मूसा बी प्रगट होया। अर बे ईशुँ बतळावा हा। ⁵पतरस बानै बतळातो देखर ईशु न बोलबा लाग्यो, “ओ गुरु ओ कत्तो चोखो ह की आपा अठै हा। म्हानै अठै तीन पंडाल बणाबा दे एक तेरो, एक मूसा को अर एक एलीया को।” ⁶बे डरगा हा ई ताँई पतरस आ बात बोली। ⁷जद ही एक बादळ आयो अर बानै ढक लियो अर बादळा मऊँ हैल्लो आयो, “ओ मेरो लाडलो बेटो ह। थे इकी सुणो।” ⁸अर बे तावळा सा च्यारूमेर देखबा लाग्या बे आपकै सागै ईशु न देख्या अर बानै बठै ओर कोई बी कोनी दिख्यो। ⁹जद बे डूंगर स निचै आर्या हा ईशु बा तीन्या न हुकम दियो की थे जो बठै देख्यो हो बिकै बारा म जद ताँई मना खिज्यो जद ताँई मिनख को बेटो मरेडा

⁹ 8:34 दुख उठाण खातिर मरबा ताँई बी तैयार होणो।

मऊँ पाछो ना जी ज्या। ¹⁰अर बे ई बात न आपका हिया क मांय न ही राखी पण बे सोचबा लाग्या की मरबा क पाछै जीबा को काँई मतबल ह? ¹¹ई ताँई पाछै बे ईशु न बूझ्या, “शास्त्रा न सीखाबाळा क्यालै बोली ही की एलीया को पेल्या आणो पक्को ह?” ¹²ईशु बण स बोल्यो, “सगळी बातां न ठिक (सई) करबा ताँई पक्कोई एलियो पेल्या आसी। पण मिनख का बेटा क बारा म ओ क्युं मंडर्यो ह की बिनै बोळो दुख भोगणो पडसी। अर लोग बिनै ठुकरासी? ¹³म थानै बताऊँ हूँ, एलियो तो पेल्याई आलियो अर लोग जो चावा हा बो बिकै सागै कर-करालियो जंय्यां की बिकै बारा म मंडर्यो हा।”

ईशु छोरा म स ओपरी-बलाय काढि

¹⁴जद बे बाकी चेला क कनै आया जणा बे देख्या की चेला क च्यारूमेर घणी सारी भीड भेळी होरी ह अर कई शास्त्रा न सीखाबाळा बाकै सागै जिद्दर्या ही। ¹⁵अर बे ईशु न बठै देख'र ताजुब करता ही भाग'र बिकै कनै गया, अर बिसै नमस्कार कर्यो। ¹⁶ईशु बण स बोल्यो, “थे आसै क्युं जिद्दर्या हो।” ¹⁷भीड क मांय स एक जणो बोल्यो, “ओ गुरु म मेरो छोरो जिकै मांय न गूंगी बलाय ह बिनै तेरै कनै ल्यायो हो। ¹⁸आ गूंगी बलाय मेरा छोरा क हर कठै ही फेंट मार दे, अर इको मूंडो झागऊँ भरज्या अर ओ दाँत पीसबा लागज्या अर ओ दिन-दिन सुख्यो जाय्यो ह। म थाकाळा चेला न खियो हो की बे ई बलाय न इकै मांय स काढ दे, पण बे ई बलाय न इमै स कोनी काढ सक्या।” ¹⁹ईशु बिकी बातां सुण'र बानै बोल्यो, “ओ अबिश्वासी मिनखो, म कद ताँई थारै सागै रैस्युं अर कद ताँई थारी सेहस्युं? बिनै मेरै कनै ल्याओ” ²⁰अर बलाय जद ईशु न देखी तो बा छोरा क मरोडी देर बिनै आडो पटक दियो अर बिकै मूंडा स झाग आबा लाग्या। ²¹ईशु बी छोरा का बाप हू बूझ्यो, “इकी या हालत कद स ह?” बो बोल्यो, “टाबर पुणा स ही इकी हालत अंय्यां की ह। ²²अर आ गूंगी बलाय इको नास करबा ताँई कदै तो इनै पाणी म अर कदै आग म पटकै ह पण म तेरुं अरदास करुं हूँ की ज तू इको जापतो कर सकै ह तो जापतो करदे अर म्हारो भलो कर दे।” ²³ईशु बिनै बोल्यो, “तू अंय्यां क्युं खेवै ह कर सकै ह तो, “बिश्वास करबाळा ताँई तो सक्युं हो सकै ह”। ²⁴बी छोरा को बाप रोयो अर ईशु स बोल्यो, “ओ प्रबु म बिश्वास राखुं हूँ, पण मेरै बिश्वास न पाक्को

करदे।”²⁵अर ईशु देखबा लाग्यो की बठै मिनखा की भीड़ लागबा लागी ह बो बी गूंगी-बैरी बलाय न दकाल'र बोल्यो, “ए गूंगी-बैरी बलाय म तनै हुकम द्युँ हूँ इकै मांय स निकळ ज्या अर इकै मांय न कदै ही मना आजे।”²⁶अर बा गूंगी बलाय बार घालर बी छोरा क मरोड़ी देर बिकै माईऊँ निकळगी अर बो छोरो मरबाळो सो होगो कई मिनख तो खेण लाग्या की ओ छोरो तो मरगो।²⁷पण ईशु बी छोरा को बावळ्यो पकडर बिनै खड्यो कर्यो अर बो छोरो खड्यो होग्यो।²⁸अर जद ईशु घरा आयो तो बीकाळा चेला एकला म बिनै बूझ्या, “म्हें बी बलाय न क्युं कोनी काढ सक्या?”²⁹ईशु बण स बोल्यो, “प्रार्थना न छोड'र अंय्यां की कुजात न काढबा को कोई उपाय कोनी।”

ईशु ओज्युँ आपकी मोत क बारा म बताओ

³⁰इकै पाछै बे बठैऊँ चल्यागा अर बे गलील क माईऊँ होर जार्या हा अर ईशु कोनी चावै हो की बिनै कोई पीछाणै, ³¹क्युं क ईशु आपका चेला न सीखार्यो हो की “मिनख को बेटो मिनखा क हाथा धोखा स पकडायो ज्यासी अर बे बिनै मार दिंगा पण बो तीन दिना क पाछै मोत ऊँ जी उठ खड्यो होसी।”³²पण आ बात बाकै पल्लै कोनी पडी अर बे बिसै ओज्युँ बूझबा ताँई डरा हा।

सगळाँ म स बडो कुण ह?

³³बे कफरनहूम म आया अर ईशु आपहाळा चेला न बूझ्यो, “थे गेला क मांय न काँई बतळावा हा?”³⁴बे चुपचाल्या होगा क्युं क बे गेला क मांय न आपसरी म बतळावा हा की आपणा मऊँ कुणसो बडो ह।³⁵ईशु बैर्यो होर बा बारा न आपकै कनै बुलायो अर बण स बोल्यो, “थारै मऊँ ज कोई बडो होणो चावै ह तो बिनै सगळाँऊँ छोटो अर सगळाँ को चर्वादार बणनो चाए।”³⁶अर ईशु बाकै सामै एक टाबरीयां न खड्यो कर्यो अर बिकै कुँवां प हाथ धर बण स बोल्यो,³⁷“जो बी मेरा नामऊँ टाबरा को मान करै ह बो मेरो भी मान करै ह अर मनै भेजबाळा को बी मान करै ह।”

जो आपणै सामै कोनी बो आपणोई ह

³⁸यूहन्नो ईशु न बोल्यो, “ओ गुरु म्हें एक मिनख न तेरै नामऊँ ओपरी-बलाय काढता देखया अर म्हें बिनै ई बजै स रोक्या की बो मिनख आपणा मऊँ कोनी हो।”³⁹पण ईशु बण स बोल्यो, “थे बिनै रोको मना जखौबी मेरै



नामऊँ चमत्कार करै ह बो मेरै बारा म तावळोसो बुरी बातां कोनी करै। ⁴⁰अर जखौबी आपणै सामै कोनी बो आपणोई ह। ⁴¹अर जखा बी मिनख थानै मसी को जाण'र एक गिलासीयो पाणी प्यावै ह' जणा आ कोनी हो सकै क इको फळ न मिलै।

घरट (9:42)

आँखळी मना बणो

⁴²मेर प विश्वास करवाळा आ नान्या मऊँ कोई एक न बी पाप म गेरबा ताँई आँखळी बणै ह बि ताँई ओई चोखो ह क बिकै नाड म घरट घालर बिनै समदर क मांय फींक दियो जावै। ⁴³ज तेरो हाथ तनै ठोकर खुवावै बिनै काट फींक। क्युं क तेरै दो हाथ होतो सोता बी तू नरक का दरियाव म गेर्यो जाय जिकी आग कदै ई कोनी बूझै इसै तो तेरो टुंडो ई ईश्वर-नगरी म बडनो चोखो ह। ⁴⁴[अर बठै को किडो मरै कोनी अर बठै की आग बूझै कोनी।] ⁴⁵अर तेरो पग तनै ठोकर खुवावै तो बिनै काट दे अर लंगडो ई ईश्वर-नगरी म बडनो चोखो ह, इसै ओ भलो ह की दो पग होता सोता बी नरक का दरियाव क माईनै गेर्यो जाय। ⁴⁶[बठै को किडो ना तो मरै अर ना बठै की आग बूझै]। ⁴⁷ज तेरी आँख तनै ठोकर खुवावै तो बिनै काढ दे काणो होर ही परमेश्वर का राज म जाणो तेरै ताँई ठिक ह। इसै की तेरै दो आँख होता सोता तू नरक म गेर्यो जाय। ⁴⁸बठै मिनखा न खावाळो किडो कोनी मरै अर मिनख न जळावाळी आग कोनी बूझै। ⁴⁹जंय्यां लूण बली न पवित्र करै ह बंय्यां ई सगळो मिनखा न आगऊँ शुद्ध कर्यो ज्यासी। ⁵⁰लूण चोखो ह पण लूण म स चरचराट चलीजा जणा बिनै कंय्यां चरचरो कर सकां हा? थे थारै म लूण जंय्यां को सुवाद राखो अर आपसरी म श्यान्तिऊँ रियो।”

तलाक की सीख

10 इकै पाछै ईशु बठैऊँ बिदा होर यहूदीया आयो अर यरदन नंदी पार कर्यो। अर भीड़ की भीड़ बिकै कनै भेळी होगी, ईशु बानै आपकी

¹ 9:41 जिन्दगी भर की भाईला-चारी निभाण को करारा।

⁵ 9:44 क्युं मानी-थानी पुराणी पौथीयां म 44 अर 46 की बाता कोनी मंड्री।

9:46 मरकुस 9:44

बाण गेल सीखाबा लाग्यो। ²जदई फरीसी विकै कनै आर ईशु न बिचासबा ताँई बिसै बूझबा लाग्या की आपणा विधान म कोई मोट्यार आपकी लूगाई न छोड सकै ह के? ³ईशु बण स बोल्यो, “मूसा थानै काँई हुकम दियो ह?” ⁴बे बोल्यो, “मूसा तो तलाक नामो मांड'र देण ताँई बोल्यो ह।” ⁵ईशु बण स बोल्यो, “मूसा आ बात थारै हिया की कुटळाई न देखता मांड्यो ह। ⁶पण जद परमेश्वर ई सरष्टि न बणायो हो जदऊँ ई बो बानै,

‘नर अर नारी करके बणायो हो। ⁷ई ताँई मोट्यार आपका माँ-बापा न छोड'र आपकी लूगाई क सागै रेहवै ⁸अर बे दोन्युं एक जीव होज्यासी, अर बे दो कोनी पण एक जीव ह।

⁹ई बजै स परमेश्वर जिनै जोड्यो ह; बिनै मिनख न तोडै।”

¹⁰जद ईशु घर क मांय न हो जणा चेला बिनै ई बात क बारा म ओज्युँ बूझबा लाग्या। ¹¹ईशु बण स बोल्यो, “जो मिनख आपकी लूगाई न छोड'र दूसरो ब्याह करै ह वो कुकर्म करै ह क्युं क वो आपकी पेलडी लूगाई क बिश्वास जोगो कोनी। ¹²अर लूगाई आपका मोट्यार न छोड'र दूसरो ब्याह करै ह तो बा बी कुकर्म करै ह।”

ईशु टाबरा न आशिर्वाद दियो

¹³लोग टाबरा न ईशु क कनै ले'र आया बे चावै हा की ईशु बा टाबरा क सिर प हाथ धरै पण चेला बानै दकाल्या। ¹⁴ईशु झाळां म भर'र चेलाऊँ बोल्यो, “थे टाबरा न मेरै कनै आबा द्यो। अर आ टाबरा न मना नटो, क्युं क परमेश्वर को राज आ जंय्यां को ही ह। ¹⁵ईशु बण स बोल्यो म थानै साँची-साँची खेवूँ हूँ की जखौ मिनख परमेश्वर का राज न टाबरा की जंय्यां कोनी अपणावै वो परमेश्वर का राज म कोनी बड सकै।” ¹⁶ईशु बा टाबरा न कनै ले'र बा क सिर प हाथ धर'र बानै आशिर्वाद दियो।

पीसाळो मिनख ईशु क कनै आयो

¹⁷जद ईशु बठैऊँ निकळर गेला म जार्यो हो बठै एक मिनख भागतो होयो ईशु क कनै आयो अर वो गोडा टेकर हाथ जोडर ईशुऊँ बूझबा लाग्यो, “ओ चोखा गुरु म जुगान्तर को जीवन पाण ताँई काँई करूँ?” ¹⁸ईशु बिसै बोल्यो, “तू मनै

चोखो क्युं बोलै ह? परमेश्वर न छोड़'र कोई बी चोखो कोनी, ¹⁹तू परमेश्वर का हुकम न तो जाणै ह जंय्यां मंडेडो ह,

“तू कुकर्म मना करजै, चोरी मना करजै, हत्या मना करजै, झुठी गुवाई मना दिजै, छळ मना करजै, अर माँ-बापा को मान करजै।”

²⁰बो मिनख ईशु न बोल्यो, “ओ महान गुरु अ हुकम तो म टाबरपुणाऊँ ई मानतो आयो हूँ।” ²¹ईशु बिकै कानी देख्यो अर ईशु न बिपै दया आई अर बिनै बोल्यो, “तेरै मांय न एक बात की कमी ह। तू जा अर तेरै कनै जो बी ह बिनै बेचर गरीबा न देदे। तनै ईश्वर नगरी म धन मिलसी, अर तू मेरै गेल होले।” ²²ई बात न सुण'र बिको मूंडो लटकग्यो अर बो दुखी होर बठैऊँ चलेगो, बो पीसाळो मिनख हो।

²³ईशु च्यारूँमेर देख'र आपका चेला न बोल्यो, “जखा मिनखा को मोह धन म ह बा मिनखा को ईश्वर नगरी म जाणो बोळो ओखो ह।” ²⁴चेला ईशु की ई बात न सुण'र ताजुब करबा लाग्या ई ताँई ईशु बण स ओज्युँ बोल्यो, “मेरा टाबरो परमेश्वर का राज म जाणो कत्तो ओखो ह? ²⁵ऊँट को सूई का नाका मऊँ निकळबा स बी पीसाळा को ईश्वर नगरी म बड़नो ओखो ह।” ²⁶बे बोळो ताजुब कर'र आपसरी म बतळाबा लाग्या, “ज अंय्यां की बात ह जणा ईश्वर नगरी म कुण जा सकै ह?” ²⁷ईशु बा कानी देख्यो अर बोल्यो, “ओ मिनख क बस को कोनी पण परमेश्वर सक्युं कर सकै ह।” ²⁸जणा पतरस ईशु न बोल्यो, “म्हें सक्युं तजर तेरै गेल आया ह।” ²⁹ईशु बोल्यो, “म थानै साँची-साँची खेवूँ हूँ ज कोई मेरै ताँई अर चोखा समचार ताँई घर, भाई-भाण, माँ-बापा, टाबर-टिकरा, अर खेत न छोड़ दियो ह ³⁰बिनै अठैई सौ गुणा घर, भाई-भाणा, माँयाँ, टाबर-टिकर अर खेत मिलसी अर सागै की सागै जुगान्तर को जीवन मिलसी। ³¹पण बोळा ह जखा की आज बूज ह बाकी बूज कोनी होसी अर जखा की बूज कोनी बाकी बूज हो जासी।”

तीसरका ईशु आपकी मोत क बारां म बताओ

³²बे यरुशलेम जार्या हा गेला म ईशु आपका चेला क आगै-आगै चालर्यो हो। चेला ताजुब म पड़ग्या अर बाकै सागै जो मिनख हा बे डर्या हा। ईशु आपका बारां चेला न एक कानी लेगो अर बानै बताबा लाग्यो की मेरै सागै काँई-

काँई बितबाळी ह। ³³ईशु बानै बोल्यो, “थे सुणो आपा यरुशलेम म जार्या हा मिनख का बेटा न धोखा स पकड़र महायाजका अर शास्त्रा न सीखाबाळा क सपुर्द कर दियो ज्यासी। अर बे बिनै जान स मारबा की सजा देर जखा यहूदी कोनी बाकै हाथा म सपुर्द कर दिंगा। ³⁴बिको तमासो बणायो जासी अर बिपै थुकींगा अर कोडा मार'र बिनै जान स मार दिंगा पण बो तीसरा दिन ओज्युँ जीन्दो हो ज्यासी।”

याकूब अर यूहन्ना की अरदास

³⁵जब्दी का बेटा याकूब अर यूहन्नो ईशु क कनै आया अर ईशुकेँ बोलबा लाग्या, “ओ गुरु म्हेँ चावां हा की जो बी म्हेँ थारै स माँगा, बो थे म्हानै द्यो।” ³⁶ईशु बण स बोल्यो, “थे मेर स काँई चाओ हो?” ³⁷बे ईशु न बोल्यो, “थारै महिमाभर्या राज म थे म्हानै थारै दांया-बांया बैठबा को सोबाग द्यो।” ³⁸ईशु बण स बोल्यो, “थे कोनी जाणो की थे काँई माँगो हो। जो पीडा स भर्यो बाटको म पीबा जार्यो हूँ के थे बिनै पी सको हो? अर जो बतिस्मो म लेबा जार्यो हूँ के थे बिनै ले सको हो?” ³⁹बे ईशु न बोल्यो, “म्हेँ अंय्यां कर सकां हा!” ईशु बण स बोल्यो, “थे ओ बाटको बी पीस्यो अर ओ बतिस्मो बी लेस्यो जखौ म लेबाळो हूँ। ⁴⁰पण मेरै दांया अर बांया बैठबा को हक म कोनी दे सकूं क्युं क जा ताँई परमेश्वर आ झवै बणाई ह बानैई बो आ झवै देसी।”

⁴¹जद दस चेला ई बात न सुणया जणा बे याकूब अर यूहन्ना प लाल ताता होगा। ⁴²ईशु बानै आपकै कनै बुलायो अर बण स बोलबा लाग्यो, “थे जाणो हो की दूसरी जात्यां का राज करबाळा मिनख जखा यहूदी कोनी बे मिनखा प हुकम चलावीं हीं अर बाका सरदार जोर जमावीं हीं। ⁴³पण थारै म अंय्यां कोनी थारै म जखौबी बडो होणो चावै बो सगळाँ को चर्वादार बणै। ⁴⁴अर थारै मऊँ जखौबी प्रधान होणो चावै बो सगळाँ को गुलाम बणै। ⁴⁵मिनख को बेटो ई ताँई कोनी आयो की बिकी सेवा करी जाय पण ई ताँई आयो ह की बो दूसरा की सेवा करै अर बोळा सारा न छुड़ावा ताँई आपका पीराण दे।”

आन्धा बरत्तिमाई न सूजबा लाग्यो

⁴⁶बे यरीहो गाँव क मांय न आया अर ईशु क सागै बिका चेला अर घणी सारी भीड़ ही बे यरीहा मऊँ निकळ'र जार्या हा, जणा तिमाई को बेटो बरत्तिमाई जिखो आंधो बीखारी हो बो सड़क क किनारै बैठ्यो हो ⁴⁷जद

बो सुण्यो की ईशु नासरी अठैऊँ जायों ह बो जोर-जोरऊँ खेबा लाग्यो, “ओ दाऊद का बेटा ईशु मेर प दया करजै।” ⁴⁸लोग बिनै दकाल’र बोल्यो, “तू चुपचाल्यो रैह पण बो ओर बी जोर जोरऊँ खेबा लाग्यो ओ दाऊद का बेटा मेर प दया करजै।” ⁴⁹ईशु बिकी सुण’र डटगो अर बोल्यो, “बिनै मेरै कनै ल्याओ।” अर बे लोग बी आन्धा न बुलाया अर बिनै बोल्यो, “राजी हो अर खड़्यो हो तनै ईशु बुलावै हा।” ⁵⁰बो आपका गाबा बगा’र बेगोसो उठ्यो अर ईशु क कनै आयो। ⁵¹ईशु बिनै बोल्यो, “तू के चावै ह की म तेर ताँई करूँ?” बो आंधो मिनख बोल्यो, “ओ गुरु म देखणो चाऊँ हूँ।” ⁵²ईशु बोल्यो, “चल्यो जा तेरो बिश्वास तनै निरोगो कर दिन्यो हा।” जणा बो बठै ही देखबा लाग्यो अर ईशु क गेल हो लियो।

यरुशलेम म ईशु की जै-जै का’र

11 जद बे यरुशलेम क सांकड़ै जैतून डूंगर की ढाळ प भसेड़ी बैतफगे अर बैतनिय्याह नगरी क कनै आया जणा ईशु आपका चेला मऊँ दो जणा न अंय्यां बोल’र अगाऊँ भेज्यो, ²“थे आगला गाँव म जाओ। थानै बी गाँव म एक गदेड़ी को बच्चो बाँधेड़ो मिलसी जिनै इब ताँई कोई काम म कोनी लियो ह बिनै खोल’र ल्याओ। ³अर थानै कोई बूझै थे ओ काँई करो हो? थे बानै बोलज्यो ‘प्रबु न ओ चाए ह’ अर बे थारै सागै बिनै भेज देसी।”

⁴बे जा’र बी गदेड़ी का बच्च्यां न गळियारा म कुवाड़ा क बाँधेड़ो देख’र बिनै खोलबा लाग्या ⁵बठै खड़्या मिनखा मऊँ कई मिनख बानै बोल्यो, “थे काँई करो हो, इनै क्यालै खोलर्या हो?” ⁶जंय्यां ईशु बानै बोल्यो हो बंय्यांई बे बा मिनखा न बोल्यो अर बे बाकी बात सुण’र बानै गधेड़ी का बच्च्यां न लेज्याबा दियो। ⁷बे गदेड़ी का बच्च्यां न ईशु क कनै लेगा, अर बिपै आपका गाबा गेर्या अर ईशु बिपै बैठगो। ⁸जद ईशु बी बच्च्यां प बैठ’र जायों हो जणा लोग गेला म आपका गाबा बीछाबा लाग्या अर कई लोग खेताऊँ हरी-भरी डाळ्याँ काट’र आवभगत करबा ताँई बीछादी। ⁹अर जताबी मिनख ईशु क आगै-पीछै हा बे जोर जोरऊँ जै-जैकार कर’र बोलर्या हा,

“प्रबु की महमा हो ओ प्रबु क नामऊँ आयों ह इनै परमेश्वर आशिर्वाद दे।

¹⁰म्हारा बडका दाऊद को राज आर्यो ह इनै परमेश्वर आशिर्वाद दे। ओ महान ह ईश्वर नगरी म प्रबु की महमा हो!"

¹¹ईशु यरुशलेम पूँच्यो अर बठै मन्दर म गयो अर बठै बो च्यारूमेर की सगळी चिजा न देख्यो अर मोड़ो होग्यो जणा बो आपका चेला क सागै बैतनिय्याह गयो।



अंजीर क पेड़ न दुर्शिष देणो

अंजीर को पेड़ (11:13)

¹²आगला दिन जद बे बैतनिय्याह मऊँ चाल पड़्या जणा ईशु न भूख लागी। ¹³ईशु दूरऊँ एक अंजीर को पेड़ देख्यो जो हर्यो-भर्यो हो बो बिकै कनै गयो जिसै बिका फळ खा सकै। पण बी पेड़ म पता न छोड़'र क्युंई कोनी हो। क्युं क बा अंजीर का फळा की रुत कोनी ही। ¹⁴ईशु बी पेड़ स बोल्यो, "इबऊँ तेरो फळ कोई कदे ही कोनी खासी" अर ई बात न ईशु का चेला सुणर्या हा।"

ईशु मन्दर म गयो

¹⁵जद बे यरुशलेम आया ईशु मन्दर म गयो अर बठै जताबी बेचबाळा अर खरिदबाळा हा बानै बठैऊँ बारनै काढबा लाग्यो। रिपीया को लेण-देण करबाळा का पाटिया न बगादियो अर कबूतर बेचबाळा का पाटिया न उन्दो कर दियो। ¹⁶अर मन्दर मऊँ किनैई क्युंई कोनी लेज्याबा दियो। ¹⁷इकै पाछै बो बानै सीख देतो होयो बण स बोल्यो, "शास्त्रा म मंडर्यो ह,

'मेरो घर सगळी जात्यां का मिनखा ताँई प्रार्थना को घर होसी। पण थे ई घर न डाकूआ की खोळ बणा दि'।"

¹⁸अर जद महायाजक अर धर्मशास्त्रि ईशु की ई बात न सुणी बे ईशु न मारबा को गेलो ढूँढबा लाग्या। पण भीड़ ईशु क परबचना म रम'र बिकै सागै ही ई बजै स बे ईशु न मारबा स डरा हा। ¹⁹अर दिन आथगो जणा बे यरुशलेम नगरीऊँ बारनै चलेगा।

सुखेडा अंजीर स सीखाबो

²⁰आगला दिन जद ईशु आपका चेला क सागै जाय्यो हो जद बे बी अंजीर का पेड़ न पता स ले'र जड़ ताँई सूखेडो देख्यो ²¹अर पतरस न ईशु की कहडी बात याद आई बो ईशु न बोल्यो, “ओ गुरु देखो जि पेड़ न थे दुर्शिश दिया हा बो सुखग्यो ह!” ²²ईशु बण स बोल्यो, “परमेश्वर म बिश्वास राखो ²³म थानै साँची-साँची खेवूँ हू ज कोई ई डूंगर स बोलै की ‘तू अठैऊँ हट’र समदर क माइनै डूब ज्या’ अर बी मिनख क हिया म ई बात प जमा ई भेम न होवै पण इकै बदला म पूरो बिश्वास होवै तो जंय्यां बो आपका मूंडा स बोल्यो बी ताँई बंय्यां ही हो ज्यासी। ²⁴जणा ही म थानै खेवूँ हू थे प्रार्थना म ओ बिश्वास करके मांग्या करो की थे जो बी माँग्या हो बो थानै मिलगो ह जणा बो थानै मिल ज्यासी। ²⁵अर जद थे प्रार्थना करबा लागो जद ही थे बा मिनखा न माफ करो जो थारो बुरो क्यो ह जिसै थारो बाप जो ईश्वर नगरी म ह बो थारा पाप माफ करसी। ²⁶अर थे बिनै माफ कोनी करो जणा थारो बाप जो ईश्वर नगरी म ह बो बी थारा पाप माफ कोनी करसी।”^f

ईशु क हक प यहूदी नेता को सवाल

²⁷बे ओज्युँ यरुशलेम म आया। ईशु मन्दर म घूमर्यो हो जद बडा याजक, शास्त्रा न सीखावाळा अर यहूदी बढका ईशु क कनै आया। ²⁸अर बे ईशु न बोल्बा लाग्या, “तू अ काम किका हक स करै ह अर ओ हक तनै कुण दियो ह?” ²⁹ईशु बण स बोल्यो, “म बी थानै एक सवाल बूझुँ ज थे मनै ई सवाल को जुबाब देद्यों जणा म बी थानै बतादयुंगो की म ओ काम किका हक स करै हूँ? ³⁰थे बताओ यूहन्ना न बतिस्मो देबा को हक परमेश्वर स मिल्यो या मिनखाऊँ? ³¹बे ईशु की ई बात न सुण'र आपसरी म बतळावा लाग्या, बे बोल्या ज आपा खेवां बिनै परमेश्वर स हक मिल्यो ह जणा ईशु आपा न खेवगो थे बिपै बिश्वास क्युं कोनी कर्या।” ³²अर आपा खेवां, “बिनै मिनखा स हक मिल्यो हो जणा अ लोग आपणा प झाळां काढसी, क्युं क अ लोग यूहन्ना न परमेश्वर की खेबाळो मानी हि।” ³³ई बजै स बे ईशु न बोल्यो, “म्हें कोनी जाणा की बिनै

^f 11:26 क्युं क मानी-थानी हाथाऊँ माण्डेडी पुराणी पौथियां म अ बाता कोनी।


ओ हक कठै स मिल्यो हो?" ईशु बाकी ई बात न सुण'र बण स बोल्यो, "म बी थानै कोनी बताऊँ की म किका हक स ओ काम करूँ हूँ।"

अंगूरा की बाड़ी का ठेकेदार

12 ईशु बण स नीति कथा म खेबा लाग्यो, "एक बार अंगूरों होयो एक मिनख अंगूरा को बगिचो लगायो अर बी बगिचा क च्यारूँमेर बाड़ बाँधी। अर बठैई अंगूरा को रस काढबा ताँई कुण्ड अर निगराणी करबा ताँई एक मचाण बनाओ। अर इकै पाछै बो ई बगिचा न ठेका प देर



मचाण (12:1)



अंगूरा को बगिचो (12:1)

दिसावर चलेगो। ²अंगूर पकणा की रत म बो मिनख दिसावरऊँ आपका दास न बा किसान क कनै भेज्यो जि स बे बठै जा'र बा किसान स अंगूरा को हिसाब ले सकै। ³पण बे किसान बी दास न पकड़'र मार्या अर बिनै रीतो ही भेज दियो। ⁴इकै पाछै बगिचा को मालीक दूसरा दास न बठै भेज्यो पण बे किसान बिनै बी मार्या अर बिको सिर

फोड़'र बिकी बैजती कर्या। ⁵बो मालीक तीसरा दास न बठै भेज्यो पण बे किसान बी दास न मार गेर्या। अंगूरोंई बो बोळा दासा न भेज्यो पण बे किसान कया न तो पीट्या अर कयाकी जान लेली। ⁶ई क पाछै बी बगिचा का मालीक क कनै भेजबा ताँणी बिको लाड़लो बेटो ही बच्यो। अर बो आ सोच'र की बे इको तो आदर करसी। ई बजै स बो आपका बेटा न बठै भेज्यो। ⁷बे किसान मालीक का बेटा न आतो देख आपसरी म बतळाबा लाग्या, 'ओ अठै को वारीश ह। आओ आपा मिल'र इनै मार देवां। अंगूरों करबा ऊँ अंगूरा को बगिचो आपणो हो ज्यावैगो।' ⁸अर बे सगळोँ किसान मिल'र बिनै मार दिन्यो अर बगिचा क बारनै बगा दियो। ⁹ई बात न सुण'र बगिचा को मालीक बा किसान क सागै काँई करसी? बो बठै ज्यासी अर बा किसान न मारैगो अर अंगूरा को बगिचो दूसरा किसान न दे देवगो। ¹⁰थे शास्त्र म ओ बचन कोनी बाच्यो के?

‘जि भाठो न कारिगर ख्याई जोगो कोनी जाण्यां बो ही भाठो कुणा न समाबाळो निकळ्यो। ¹¹अर ओ आँख्या क सामनै अजूबो ह इनै प्रबु कर्यो ह।’

¹²बठै खड्या शास्त्रि समझगा की ओ आ नीति कथा बापैई कही ह। ई बजै स बे ईशु न कैद करबाताँणी कोई गेलो हूँहवा लाग्या। पण बे मिनखा स डरता हा जिसै बे बिनै बठै हि छोड़’र चल्यागा।

चुंगी देबा की सीख

¹³बे ईशु न फसाबा ताँई फरीसीयां अर हिरोद की मानबाळा क्युंक मिनखा न बिकै कनै भेज्या। ¹⁴बे ईशु क कनै गया अर बिऊँ बोलबा लाग्या, “ओ गुरु म्हें जाणा हा की तू बोळो ईमानदार ह अर तू ई बात की परवा कोनी करै की लोग तनै काँई खेवै ह। अर तेरा बारा म काँई सोचै ह। अर तू मिनखा को मूंडो देख’र बातां कोनी करै पण परमेशबर क कनै जाण ताँई जखौ गेलो ह बिनै तू सञ्चाईऊँ बतावै ह। पण म्हें तनै बूझै हा की कैसर न चुंगी देणी चाए की कोनी?” ¹⁵ईशु बाकी चाल न भापगो अर बण स बोल्यो, “थे मनै क्युं बिच्यास्यो हो? थे मेर कनै एक सिक्को ल्याओ जिसै म देखुँ।” ¹⁶बे ईशु न एक सिक्को दिन्यो। अर ईशु बण स बूझ्यो, “इपै किकी सकल अर किको नाम ह?” बे बोल्यो, “कैसर की।” ¹⁷ईशु बाकी ई बात न सुण’र बोल्यो, “जखौ कैसर को ह बो कैसर न द्यो अर जखौ परमेशबर को ह बो परमेशबर न द्यो।” बे ईशु की ई बात न सुण’र ताजुब म पडगा।

मर्या पाछै जिबा प सवाल

¹⁸इकै पाछै सदुकी ईशु क कनै आया अ मानी ही क मरेडी काया ओज्युँ कोनी जीवै अर बे ईशु न बूझबा लाग्या, ¹⁹“ ओ गुरु मूसा म्हारै ताँई मांड्यो ह की जिको भाई मर ज्यावै अर बिकी लूगाई क कोई टाबर न होवै जणा मरबाळा को भाई बिकी लूगाई स ब्याह करले जिसै बो आपका भाई को वंश बढावै। ²⁰एक बार सात भाई ह। बा म स बडोडा को ब्याह होयो अर क्युंक दिना क पाछै वो मरग्यो बिकी लूगाई क कोई टाबर- टिकर कोनी हो। ²¹बिको दूसरो भाई बिसै ब्याह कर लियो अर बो बी क्युंक दिना क पाछै मरगो अर बिसै बी

बिकै कोई टाबर कोनी होयो। तीसरो भाई बी अंय्याई कयो अर बिकै सागै बी बो ही होयो। ²²अर अंय्याई सात्युं का सात्युं बे औलाद ही मरगा अर बिकै पाछै बा लूगाई बि मरगी। ²³बे ईशु न बूझबा लाग्या की सगळी मरेडी काया ओज्युं जीसी बी दिन बा सात म स किकी लूगाई होसी। क्युं क बे सात्युं हि बिनै ब्याली ही।” ²⁴ईशु बण स बोल्यो, “थे आ बातां न गळत लेली क्युं क थे शास्त्रा न अर परमेश्वर की शक्ति न कोनी जाणो। ²⁵जद मरेडी काया ओज्युं जीसी जणा बाको ब्याह कोनी होसी पण बे ईश्वर नगरी म ईश्वर नगरी दूता की जंय्यां होसी। ²⁶अर जठै ताँई मरेडी काया क जीबा को सवाल ह, थे मूसा की पौथी म ओ कोनी बाच्यो के? जद परमेश्वर बळती झाडी म स बिसै खयो ‘म ईब्राहिम को परमेश्वर हूँ, इसाक को परमेश्वर हूँ अर याकूब को परमेश्वर हूँ।’

²⁷इको मतबल ओ ह की बे मर्गा पण बे मरेडा कोनी जिन्दा ही जणा ई बो मर्या खप्या को कोनी पण जिता-जागता को परमेश्वर ह। थे तो भेम म पड्या हो।”

सगळाँ मऊँ बडो हुकम

²⁸बठै एक यहूदी शास्त्रा न सीखाबाळो आयो अर बो बानै बठै जिरै करता अर ईशु बा सदुकीया न सागैडो जबाब देर्यो हो आ देखर बो ईशु न बूझ्यो, “सगळाँ हुकमा मऊँ कुणसो बडो ह?” ²⁹ईशु बिसै बोल्यो, “सगळाँ मऊँ बडोडो ओ ह। ‘सुणो ईस्त्राएलियो आपणा परमेश्वर न छोड’र कोई प्रबु कोनी ह। ³⁰अर थे आपका सगळाँ हियाऊँ सगळी आत्मा स सगळी बुद्धिऊँ अर आपकी सगळी शक्तिऊँ परमेश्वर न प्रेम करो।’ ³¹अर दूसरो हुकम ओ ह ‘तू तेरा पडोसीऊँ बंय्यां ही प्रेम कर जंय्यां तू खुदऊँ प्रेम करै ह।’

आ हुकमा स बडो कोई बी हुकम कोनी।” ³²यहूदी शास्त्रा न सीखाबाळा ईशु की ई बात न सुणर बोल्यो, “ओ गुरु थारो ओ खेणो ठिक ई ह की परमेश्वर एक ई ह अर बिनै छोड दूसरो कोई कोनी। ³³आपका सगळाँ हियाऊँ [] सगळी बुद्धिऊँ अर आपकी सगळी शक्तिऊँ परमेश्वर न प्रेम करो अर आपका पडोसीऊँ खुद की जंय्यां प्रेम करो। अर अ दोन्युं सगळाँ होम बली अर चढावाऊँ बढके ह।” ³⁴जि चतराईऊँ

^u 12:33 क्युं क पौथियां म सगळाँ हिया क पाछै सगळी आत्माऊँ बी मडर्यो ह।

वो जबाब दिन्यो हो विकी सुण'र ईशु बिसै खयो, “तू परमेश्वर का राज हू घणी दूर कोनी।” ई क पाछै किकी ई ईशुँ सवाल बूझबा की हिम्मत कोनी बगी।

मसी किको बेटो ह?

³⁵इकै पाछै ईशु मन्दर म परबचन देतोई बोल्यो, “शास्त्रा न सीखाबाळा क्यालै बोली ई की मसी दाऊद क कुणबा को बेटो ह? ³⁶पण दाऊद खुद पवित्र आत्मा स भर'र बोल्यो हो,

‘प्रबु (परमेश्वर) मेरा प्रबु (मसी) ऊँ खियो जद ताँई म तेरा दुश्मना न तेरै पगा तळै न कर द्युँ मेरै दांया हाथ बैठ्यो रैह।’

³⁷दाऊद खुद ई मसी न प्रबु बोलै ह जणा मसी दाऊद को बेटो कंय्यां हो सकै ह?” घणी सारी भीड़ ईशु की बातां न राजी हियाऊँ सूपै ही।

शास्त्रा न सीखाबाळा ऊँ बच'र रिज्यो

³⁸ईशु बानै सीखातो ई बोल्यो, “थे शास्त्रा न सीखाबाळाऊँ समळ'र रिज्यो बे लाम्बो-लाम्बो चोंगो पेरीं ही अर बानै घूमणो चोखो लागै ह अर बे चावी ही की लोग बजारा म बाको आदर-मान करीं। ³⁹अर बे यहूदीयां का प्रार्थना घर अर जीमणवार म उँची गद्दी प बिराजणा की मन्स्या राखै ह। ⁴⁰बे खाली होयडी लूगायां को घर खाज्याई ही। अर दिखावा ताँई बडी बडी प्रार्थना करीं ही। आ मिनखा न बुरी ऊँ बुरी सजा मिलसी।”

साँच्चो दान

⁴¹ईशु यरुशलेम मन्दर की दान पेट्टी क सामै बैठ'र देखर्यो हो की लोग दान हाळी पेट्टी म कंय्यां दान घाली ही। पीसाळा तो बड-चढ'र दान घालर्या हा। ⁴²बाकै पाछै बठै एक खाली होयडी गरीबणी आई अर बा बी पेट्टी क मांय दो डब्बली हाळा सिक्का घाली अ सिक्का क्युं पीसा जत्ता होता हा। ⁴³ईशु आपका चेला न आपकै कनै बुलायो अर बण स बोल्यो, “म थानै साँच्चि-साँच्चि खेवूँ ह ई खाली होयडी को दान सऊँ बेसी ह। ⁴⁴क्युं क सगळाँ तो आपकी बढती मऊँ घाल्या पण आ खाली होयडी आपकी सगळी कुमाई इमै घाल दि। इकै कनै अत्तो ही हो जिसै इको चूल्लो बळतो।”

मन्दर ढब्बा की भविष्यवाणी

13 जद ईशु यरुशलेम का मन्दर क मांय स बारनै जायों हो जणा बी टेम बीकाळा चेला म स एक चेलो ईशु न बोल्यो, “ओ गुरु देख अ भाठा अर आ हेल्ली कत्ती सोवणी हा” ²ईशु बिकी ई बात न सुण’र बिनै बोल्यो, “के तू ई बडी सारी हेल्ली न देखै ह? अठै एक बी भाठो कोनी रेहसी सगळाँ भाठा ढा दिया जासी।”

विपदा अर सताव

³जद ईशु जैतून का डूंगर प मन्दर क सामै बैठ्यो हो जणा बिसै पतरस, याकूब, अर अन्द्रियास एकला म बूझ्या ⁴बे ईशु न बूझ्या, “अ बातां कद घटसी? अर आ बातां क होण का चिन काँई होसी?” बाकी बातां सुण’र ⁵ईशु बानै बोल्यो, “थे समळ’र रिज्यो थारै सागै कोई छळ न करज्या। ⁶मेरा नामऊँ बोळा सारा आसी अर खेसी ‘म मसी हूँ’ अंय्यां बोल’र बे बोळा सारा मिनखा न भरमासी। ⁷अर जद थे लड़ाई अर लड़ायां की खबर्याँ सुणो जणा मना डर ज्यायो, क्युं क आ बातां को होणो तै ह पण बा घड़ी नास की कोनी होसी। ⁸अर जात्यां जात्यां प अर देश देश प चढाई करसी। अर कठै-कठै तो भूचाळ आसी अर काळ पड़सी अर अ सगळी बातां हाल तो जच्चा क सरुका उठबाळा दर्द जंय्यां की ह। ⁹पण थे समळ’र रिज्यो, थानै पकड़’र कचेरी क सपुर्द कयों ज्यासी अर थानै यहूदीयां की धर्म सभा म पीट्यो जासी अर थानै मेरा नाम अर चोखा समचार की बजै स पंचा, राजा अर हाकिमा क सामै खड्यो कर दियो जासी जिसै थे बानै चोखो समचार बता सको। ¹⁰पण आ पक्की ह की आसै पेल्या सगळी जात्यां न चोखो समचार सुणायो जासी। ¹¹अर जद थानै पकड़’र लोग कचेरी क हवालै करीं जणा थे ई बात की जमाई चिनत्या मना करज्यो की थानै काँई खेणो ह? बी घड़ी पवित्र आत्मा जखा सब्द दे बे ही बोलज्यो क्युं क बोलबाळा थे कोनी पण पवित्र आत्मा होसी। ¹²भाई-भाई न पकड़ा’र मरवासी अर अंय्यां ही बाप आपका टाबरा क सागै करसी अर टाबर आपका माँ- बाप क खिलाफ हो’र बानै मरवासी। ¹³अर मेरा नाम क बजै स सगळाँ मिनख थारै स बैर राखसी, पण जिखा आखिर ताँई सब’र करसी बे ई बचाया जासी।

बिनास की घड़ी

¹⁴जद थे उजाड़बाळी सुगली चिजा न जठे न होणी चायै ई बठै देखो (बाचबाळो खुद ही जाण ले इको मतबल काँई ह?) जणा जखौ यहूदीयां म होवै, बानै डूंगरा म भाग जाणो चाए। ¹⁵अर जखौ मिनख आपकी छात प होवै बे आपका घरा म क्युंई चिज ल्याण ताँई न उतरै। ¹⁶अर जखा खेत म होवै बो आपका गाबा लेण ताँई न मुडै। ¹⁷दुध प्याती माँयाँ अर पेट हाळी लूगायां ताँई बे दिन बोळी कल्डाई का होसी। ¹⁸थे प्रार्थना कर्या करो की अ बातां श्याळा म न हो। ¹⁹बा दिना म अंय्यां को कळेस आसी जखौ जुगाद म जद परमेश्वर ई दुनिया न रची जदऊँ ले'र न तो हाल ताँई आयो अर न इकै पाछै कणा आसी। ²⁰ज परमेश्वर बा दिना न कम ना करतो तो कोई बी कोनी बचतो। पण बिका टाळेडा मिनखा की बजै स परमेश्वर बा दिना न कम करदियो ह। ²¹बा दिना म थानै कोई खेवै, 'देखो अठै ह मसी या बठै ह मसी' जद थे बिको बिश्वास मना करज्यो। ²²थानै बा दिना म झुठा मसी अर झुठी परमेश्वर की खेबाळा दिखणा म आसी। अर बे चिन-चमत्कार दिखा'र टाळेडा मिनखा न बी भेकाण की कोसीश करसी। ²³पण थे समळ'र रियो म थानै अ सगळी बातां पेल्या स ही बता दिनी ह।

मिनख का बेटा को ओज्युँ आणो

²⁴बा दिना म, बी कळेस क पाछै सूरज उजाळा न खो देसी अर चाँद बी कोनी चमकसी। ²⁵अर अकास मऊँ तारा बी तळै पड़ मरसी। अर अकास की शक्तियाँ हिलाई जासी जिसै बे आपकी झघा छोड देसी। ²⁶जणा लोग मिनख का बेटा न महाशक्ति अर महिमा क सागै बादळा प आतो देखसी।

²⁷अर बो आपका दूता न भेजसी की बे धरती अर अकास प जा'र च्यारूमेर स बिका टाळेडा मिनखा न भेळा करीं।

²⁸“थे अंजीर का दरखतऊँ सिखो जद बिकी डाळयाँ नरम होवै अर बिकै कुपळ फूटबा लागै जणा थे बिनै देख'र जाण ज्यायो हो की उंद्याळो आबाळो ह। ²⁹अंय्यां हि जद थे आ बातां न होता देखो जणा जाणज्यायो की बा घड़ी सांकडै ही ह। अर थळी प हि ह। ³⁰याद राखीयो, म थानै साँच्ची खेवूँ हूँ जद ताँई अ बातां कोनी होसी ई जमाना का मिनख कोनी मरसी। ³¹अकास अर धरती टळ जासी पण मेरी बातां कोनी टळी।

जागता रियो


³²बी दिन अर बी घड़ी क बारा म कोई बी कोनी जाणै, न तो ईश्वर नगरी दूत अर ना बेटो पण पीता परमेश्वर हि बिकै बारा म जाणै ह। ³³ई बजै स थे समळ'र जागता रिज्यो थानै कोनी बेरो की बो दिन कद आसी अर न थे बी दिन क बारा म जाणो। ³⁴ओ अंय्यां होसी जंय्यां कोई मिनख दिसावर जाण स पेल्या आपका घर न आपका दास क हवालै करके बानै न्यारो-न्यारो काम बाँट'र चलयो जावै अर चौकिदार न पेरो लगाबा को हुकम देर अंय्यां बोल'र की जद ताँई म कोनी आऊँ तू घर की समाळ करजै। ³⁵थे बी जागता रिज्यो थानै कोनी बेरो की घर को मालीक कद आवगो। आथण्या आवगो क मझ रात म आवगो क भागपाट्या आवगो या दिन चढ़्या आवगो। ³⁶अर अंय्यां ना होज्या कणा बो चाणचुक्यो आर थानै सोतो देखै। ³⁷अर जखी बातां म थानै खेवूँ हूँ बे ही बात म सगळाँ न खेवूँ हूँ की थे सगळाँ जागता रिज्यो।”

ईशु न मारबा की जाळ-साजी

14 दो दिना क पाछै फसह को त्युंहार^v अर बिना खमीर की रोटी को त्युंहार^w आबाळो हो। बडा-बडा याजक अर शास्त्रि ईशु न धोखा स पकड़'र मारबा की साजिश रचर्या ह। ²पण बे आपस म खेबा लाग्या, “आपा ईशु न त्युंहार क दिना म कोनी मारा। आपा त्युंहार क दिना म इनै मारा तो के बेरो जनता भड़क ज्यावै।”

ईशु प अत्तर-फुलेन गेर्यो

³जद ईशु बैतनिय्याह म शमोन जखौ पेल्या कोठी हो बिकै घरा रोटी खाबा बैठ्यो, बठै एक लूगाई संगमरमर का बर्तन म जटामांसी (बाळ झड़)को मेंगो अर खरो अत्तर-फुलेन ले'र आई। अर बा लूगाई बी बर्तन न खोल'र



संगमरमर को बर्तन (14:3)

^v 14:1 फसह(पार कर जाणो) को त्युंहार जद परमेश्वर ईब्रानिया का घरा न छोडर मिस्र का पेलेपोत का होयडा न मार्यो हो बी याद म मनायो जावै ह।

^w 14:1 ई दिन यहूदी बिना खमीर की रोटी क सागै एक खास तरयां को भोज करता ह।

बिकै माइनै जत्तो बी अत्तर-फुलेन हो बिनै ईशु क सीर प उन्दका दि। ⁴बठै खड्या मिनखा म क्युंक चिडगा अर खया, “आ लूगाई ई अत्तर-फुलेन न क्यालै खराब करी ह? ⁵ई अत्तर-फुलेन न तीन सो चाँदि का सिक्का^x ऊँ बी ज्यादा म बेच्यो जा सकै हो अर इसै जखा रुपया मिलता बिनै गरीबा म बाँट्यो जाणो चायै हो।” अर बे बिनै दकालबा लाग्या। ⁶ईशु बाकी ई बात न सुण'र बानै बोल्यो, “थे ई लूगाई न क्युं तंग करो हो? थे इनै छोड द्यो। आ तो मेर सागै भलो करी ह। ⁷गरीब तो थारै सागै सदा हि रेहसी। थे जद चावो बाको भलो कर सको हो, पण म थारै सागै सदा कोनी रेस्युं। ⁸अर जो क्युं बिकै बस म हो बा करी। आ मनै गाडण हू पेल्या मेरी काया प अत्तर-फुलेन उन्दकाई ह। ⁹म थानै साँच्ची खेवूँ हूँ सगळी दुनिया म जठै बी चोखो समचार परचार कर्यो ज्यासी, बठै ई लूगाई न अर इका काम न याद कर्यो ज्यासी।”

यहूदो ईशु न धोखो देबा ताँई राजी होयो

¹⁰यहूदा इस्करियोती बारा चेला मऊँ एक हो ओ बडा याजक क कनै ईशु न पकडाबा की बातचीत करबा ताँई गयो। ¹¹यहूदा की ई बात न सुण'र याजक खुश होयो अर बे यहूदा न रुपया देण ताँई बोल्यो। यहूदो ह जखौ ईशु न पकडाबा की ताक म मौको ढूँढबा लाग्यो।

चेला क सागै आखरी फसह

¹²बिना खमीर की रोटी हाळै त्युंहार क पेल्लै दिन जद फसह का त्युंहार प ललडी का बच्च्यां की बली दि जाती ही बी दिन चेला ईशु न बूझ्या, “तू कठै चावै ह की म्हें तेर ताँई फसह खाबा की तैयारी करा?” ¹³बामैऊँ दो जणा न ईशु अंय्यां बोल'र भेज्यो, “थे गाँव क मांय न जाओ अर थानै बठै एक मिनख पाणीऊँ भरेडो घडो लीया मिलसी थे बिकै गेल हो लियो ¹⁴अर बो जि घर म जावै, थे बी बि घर म जा'र घर का मालीक न बोलज्यो गुरु बोल्यो ह, ‘मेरो फसह खाबा को कोठो कठै ह जठै म आपका चेला क सागै फसह खा सकूँ।’ ¹⁵बो थानै बडो सारो अर सक्युं जच्यो-जचाईडो चोबारो दिखासी बिमैई आपणा ताँई सक्युं तैयार करज्यो।” ¹⁶अर बे चेला बी गाँव क माईनै गया अर जंय्यां ईशु बानै बताओ हो बंय्यां ही बे बठै देख्यो अर बे बठै फसह खाबा की तैयारी करी।

^x 14:5 एक साल की मजदुरी क बराबर

17अर दिन आथता ही ईशु बारा चेला क सागै बठै गयो 18अर जद बे सागै बैठ'र रोटी खार्या हा ईशु आपका चेला न बोल्यो, "म थानै साँच्ची खेवूँ हूँ थारै मऊँ एक जणो जो अठै मेरै सागै जीमर्यो ह बो मनै पकड़वासी।" 19बे ईशु की ई बात न सुण'र दुखी होया अर बे ईशु न एक- एक करके बूझबा लाग्या, "माराज बो म हू के?" 20ईशु बण स बोल्यो, "बो थारै बारा मऊँ एक ह। बो मेरै सागै कचोळा मऊँ टिमोवै ह। 21मिनख का बेटा न तो मरनो ई ह जंय्यां की मंडेडो ह। पण कत्ती बुरी दसा ह बी मिनख की जिकै बजै स मिनख को बेटो पकड़ायो जासी। इसै चोखो तो ओ होतो की बो मिनख कोनी जलमतो।"

प्रबु- भोज

22बे जिमर्याई हा क ईशु रोटी ले'र प्रबु न धनेवाद दे'र बो रोटी न तोड़्यो अर ईशु आपका चेला न आ खेवतो रोटी बाटी, "ल्यो आ मेरी काया ह" 23इकै पाछै ईशु कचोळो लियो अर प्रबु न धनेवाद दे'र बो कचोळो आपका चेला न दियो बे सगळाँ बिसै स पीया 24अर ईशु बण स बोल्यो, "ओ मेरो लोय ह ओ परमेशबर का नया करा'र को चिन्ह ह जखौ बोळा ताँई बहायो ज्यार्यो ह। 25म थानै साँच्ची खेवूँ म आ अंगूरी जद ताँई कोनी पीस्युं जद ताँई परमेशबर का राज म नई न पीऊँ।" 26इकै पाछै बे एक गीत गा'र जैतून का डूंगर प चल्यागा।



कुंड (14:25)

पतरस ईशु न पीछाणबा ऊँ मना करसी

27ईशु आपका चेला ऊँ बोल्यो, "थे सगळाँ कानी-कानी हो ज्यास्यो। क्युं क मंडेडो ह,

'म गुवाळ्याँ न मारूंगो अर भेड़ तीन-तेरा हो ज्यासी।'

28पण परमेशबर क हाथा ओज्युँ जी उठबा क पाछै म थारै स पेल्या गलील जास्युँ।" 29जणा पतरस बोल्यो, "चायै सगळाँ तनै छोड'र भाग ज्याय पण म थारै सागै डट्यो रेस्युं।" 30ईशु पतरस की ई बात न सुण'र बिसै बोल्यो, "म

तनै साँची खेवूँ हू आज की रात ही मूर्गा क दो बार बाँग देण हू पेल्या तू तीन बार मनै पीछाण्वा हू मना करसी।”³¹पतरस ईशु की बात सुण’र ओर जोर स बोल्यो, “ज मनै तेरै सागै मरबो बी पड़यो जणा बी म अंय्यां कोनी करँ।” अर सगळों चेला बी आई बात बोल्यो।

गतसमनी का बाग म ईशु की प्रार्थना

³²इकै पाछै बे गतसमनी नाम की झंघा गया अर बठै ईशु आपका चेला न बोल्यो, “थे अठै ही बैठ्या रियो जद ताँई म प्रार्थना करँ।”³³ईशु आपकै सागै पतरस, याकूब अर यूहन्ना न लेगो। ईशु बोळो दुख-दुबळो होर्यो हो।³⁴ईशु बण स बोल्यो, “मेरो हियो बोळो उदास ह, अठै ताँई म मरबाळो सो होर्यो हू। थे अठै ही बैठ ज्यायो अर जागता रियो।”³⁵इकै पाछै ईशु बठैऊँ चीनेक दूर जा’र धरती प मोदो पसर’र प्रार्थना करबा लाग्यो अर बोल्यो, “ज हो सकै तो आ घड़ी मेर पै स टळ ज्याय जणा चोखो हो ज्याया।”³⁶अर बो बोल्वा लाग्यो, “बापु ओ बापु थारै ताँई क्युं ही ओखो कोनी। ई दुख का कचोळा न मेरऊँ नाकै कर दे, पण जंय्यां म चाऊँ बंय्यां न हो पण जंय्यां तू चावै बंय्यांई होवै।”³⁷ईशु प्रार्थना कर’र आपका चेला कन गयो अर बानै सुत्यो देख’र पतरस न बोल्यो, “ओ शमोन तू सोर्यो ह के? के तू घंटा भर बी कोनी जाग सक्यो? ³⁸थे जागता रियो अर प्रार्थना करो जिसै थे बीचास्यां न जाओ। आत्मा तो जो सई ह बो करनो चावै ह पण आ काया माड़ी ह।”³⁹ईशु ओज्युँ स प्रार्थना करबा न चलेगो अर जंय्यां पेल्या प्रार्थना करी बंय्यां ही बो प्रार्थना करबा लाग्यो।⁴⁰अर ईशु ओज्युँ स आपका चेला क कनै आयो अर बिनै बे ओज्युँ सुत्या लाध्या अर बाकी आँख्या म निंद चढरी ही अर बानै बेरो कोनी हो की बे ईशु न काँई जबाब दि।⁴¹ईशु तीसरी बार आ’र बानै बोल्यो, “बस बोळा सोलीया हालबी थे अराम स सुत्या हो। देखो बा घड़ी आगी जद मिनख को बेटो पाप्यां क हाथ पकड़ायो जार्यो ह।⁴²थे उठो अर देखो मनै पकड़ाबाळो उरैई ह।”

ईशु न धोखा ऊँ पकड़ायो

⁴³ईशु अंय्यां बोलर्योई हो क यहूदो जो बारा चेला मऊँ एक हो बो आपकै सागै प्रधान याजक अर शास्त्रा न सीखाबाळा अर बढका का हुकम ऊँ घणी सारी भीड़ ले’र बठै आयो बाकै कनै तलवार अर लाठ्यां बी ही।⁴⁴धोखा ऊँ पकड़ाबाळो पेल्या ही बी भीड़ न बता दिन्यो हो की जिको म माखो ल्युँ बो ई

ईशु ह थे बिनै पकड़'र ध्यानऊँ सिपाया की निगराणी म लेज्यायो। ⁴⁵अर जंय्यां ही यहूदो बठै आयो अर वो ईशु क कनै जा'र बोल्यो, "गुरु" अर वो ईशु को माखो लियो। ⁴⁶इकै पाछै बा भीड़ बिनै पकड़'र आपका कब्जा म लेली। ⁴⁷ईशु क कनै खड़्यो एक चेलो आपकी तलवार काटि अर महायाजक का एक दास को कानडो काट गेयो। ⁴⁸ईशु बण स बोल्यो, "म कोई डाकू हू के थे मनै पकड़बा ताँई तलवार अर लाठी ल्याया हो?" ⁴⁹म रोजिना मन्दर म थानै सीखातो, थारै सागै ही रिया करतो हो जद थे मनै कोनी पकड़या, पण ओ पवित्र-शास्त्र म मंडेडो ह जिनै पूरो होणो ही हा" ⁵⁰ईशु का चेला बिनै छोड़'र भागगा।

⁵¹एक मोट्यालडो आपकी उघाड़ी काया प चादरो ओढ ईशु क गेल गेल होयो हो लोग बिनै पकड़बा ताँई बिकै गेल; भाग्या ⁵²जणा वो चादरो बगा'र उघाड़ो ही भाग छुट्यो।

महा पंचायत म ईशु

⁵³ईशु न महायाजक क कनै लेगा, अर बठै प्रधान याजक अर बढका अर सगळौं शास्त्रि आर भेळा होया। ⁵⁴पतरस क्युं दूरी बणा'र बाकै गेल-गेल आयो अर महायाजक क आँगणा क मांय न आर बठै चौकिदार क सागै तपबा लाग्यो। ⁵⁵प्रधान महायाजक अर सगळौं महापंचायत का लोग ईशु न जान स मारबा ताँई बिकै खिलाफ गुवाई टोबा लाग्या। पण बानै कोई गुवाई कोनी मिली। ⁵⁶घणा सारा लोग ईशु क खिलाफ गुवाई बी देर्या हा पण बाकी गुवाई झुठी ही अर एक जिस्सी बी कोनी ही। ⁵⁷क्युं खड़्या हो'र ईशु क खिलाफ झुठी गुवाई देबा लाग्या। ⁵⁸बे खेबा लाग्या, "म्हें इका मूंडा स सुण्या हा ओ खेवै ह, 'म हाथ हू बणेडा मन्दर न ढा देस्युं अर तीन दिना क पाछै दूसरो बणा देस्युं वो मन्दर हाथा हू बणायडो कोनी होसी।'" ⁵⁹अर ई बा'र बी बाकी गुवाई एकसी कोनी निकळी। ⁶⁰बाकी बातां सुण'र महायाजक खड़्यो हो'र ईशु न बूझबा लाग्यो, "तू जबाब क्युं कोनी देवै अ सगळौं तेरै खिलाफ गुवाई देर्या ही।" ⁶¹पण ईशु चुपचाल्यो बाकी सुणतो रियो अर वो बानै जबाब कोनी दियो। महायाजक ईशुऊँ ओज्युं बूझ्यो, "तू पवित्र परमेश्वर को बेटो मसी ह के?" ⁶²ईशु बोल्यो, "हा म बोई हूँ अर थे मिनख का बेटा न सर्वशक्तिमान परमेश्वर क दांया हाथ बैठ्यो अर अकास म बादळा क सागै आतो देखस्यो।" ⁶³महायाजक आपका गाबा फाड़यो अर बोल्यो, "इब गुवाई देबा की जुरत कोनी। ⁶⁴थे खुद ही इका मूंडा स परमेश्वर की बुराई सुण लीया हो इब थे काँई

चावो हो?" अर बे सगळाँ बोल्या, "इनै मा'र देणो चाए।" ⁶⁵अर कई लोग ईशु प थुकबा लाग्या अर कई ईशु की आँख्या प गावो बाँध'र मुक्का मारबा लाग्या अर बिको तमासो बणा'र बोल्या, "तू भविष्यवाणी करतो फिरतो हो न इब बता तनै कुण मार्यो" अर चौकिदार ईशु न पकड़'र चनपट मार्या।

पतरस ईशु न जाण-बुझ'र कोनी पीछाण्यो

⁶⁶पतरस निचै आँगणा म बैठ्यो जणा बठै महायाजक की एक दासी आई। ⁶⁷अर बा पतरस न तपता देख'र पतरस न बोली, "तू बी तो ईशु नासरी क सागै हो।" ⁶⁸पण पतरस नटगो अर बोल्यो, "म ईशु नासरी न कोनी जाणूँ अर तू जो बोलरी ह बा मेरै तो क्युंई पल्लै कोनी पड़री।" अर बो अंय्यां बोलतो आँगणा की थळी प पूँच्योई हो [अत्ता म ही मूर्गो-बाँग दिनी]। ⁶⁹बा दासी ओज्युँ पतरस न देखी अर बठै खड़्या मिनखाऊँ बोली, "ओ बी बामैऊँ ई हा।" ⁷⁰पतरस ओज्युँ नटगो थोड़ी देर क बाद बठै खड़्या मिनखा मऊँ कई बोल्या, "सई म ई तू बामैऊँ एक ह, क्युं क तू बी तो गलील को हा।" ⁷¹पतरस बाकी बातां सुण'र सोगन खा'र बोल्यो, "म बी मिनख न जिकी थे बातां करो हो कोनी जाणूँ ज म झुठ बोलूँ तो परमेश्वर मनै सजा दे।" ⁷²अर जद ही दूसरी बार मूर्गो बाँग दिनी। जणा पतरस माथो पकड़्यो अर बिनै ईशु की खेईड़ी बा बात याद आई की मूर्गा क दो बार बाँग देण हू पेल्या तू तीन बार मेरै ताँई खेसी म इनै कोनी जाणूँ, अर बो ई बात न सोच'र बळ-बळ रोबा लाग्यो।

पीळातूस क सामै ईशु की पेशी।

15 दिन उगता ही प्रधान याजक अर बुढा ठेरा, शास्त्रि अर सगळाँ महासभा का पंच ईशु न बँधा'र पीळातूस कन लेज्या'र हाजीर कर्यो। ²पीळातूस ईशुऊँ बूझ्यो, "तू यहूदीयां को राजा ह के?" ईशु बिनै खयो, "तू खुद ही तो बोलै हा।" ³प्रधान याजक ईशु प बोळी बातां को दोष लगार्या हा। ⁴पीळातूस ईशु न ओज्युँ बोल्यो, "तू बोल-बाल्यो कंय्यां खड़्यो ह अ सगळाँ तो तेर प दोष लगार्या लागर्या ही।" ⁵पण ईशु बिनै जबाब कोनी दियो ईशु न बोल-बाल्यो देख'र पीळातूस न ताजुब होयो।

¹ 14:68

"अत्ता म ही मूर्गो-बाँग दिनी" क्युंक मानी-थानी पुराणी पौथियां म अ बाता कोनी मंडरी।

ईशु न मोत की सजा देणो

⁶फसह हाळा त्युंहा'र प पीळातूस रित गेल एक कैदी न जिनै लोग चाता बिनै बा ताँई छोड़ देतो हो। ⁷बी टेम बरअब्बा नाम को एक मिनख बगाव्तिया क सागै कैद म हो क्युं क बो एक बगावत म एक मिनख न मार गेर्यो हो। ⁸जद लोग पीळातूस क कनै जा'र बिसै कह्या जंय्यां तू म्हारै ताँई करतो आयो ह बंय्यां ही कर। ⁹जणा पीळातूस बण स खयो, “के थे चाओ हो के म थारै ताँई यहूदीयां का राजा न छोड़ द्युँ?” ¹⁰पीळातूस अंय्यां ई बजै स बोल्यो क्युं क बो जाणतो हो की अ याजक जळता-बळता इनै पकड़ाया ही। ¹¹पण याजक बरअब्बा न पीळातूसऊँ छुडाण ताँई भीड़ न पैल्याऊँ उकसा राख्यो। ¹²पीळातूस बण स ओज्युँ बुझ्यो, “थे जिनै यहूदीयां को राजा खेओ हो बिको म काँई करुं थे बताओ थे काँई चाओ हो?” ¹³बे कुँक'र बोल्या, “इनै सूळी चढा द्यो!” ¹⁴पीळातूस बण स बोल्यो, “म इनै क्युं सूळी चढाऊँ ओ लाई कुणसी बुराई करी हा।” पण बे मिनख बुर्यां हि करबा लाग्या, “इनै सूळी चढा द्यो।” ¹⁵पीळातूस भीड़ न राजी करबा ताँई बरअब्बा न छोड़ दियो अर ईशु क कोडा मरवाया जिकै पाछै सूळी चढाबा को हुकम दियो।

सिपाईडा क हाथा ईशु की बैजती

¹⁶सिपाईडा ईशु न राजपाल क गढ का आँगणा म लेगा। अर बे सगळी पलटण न भेळी करली। ¹⁷बे ईशु न बैंगणी रंग को गाबो पीरा'र बीकाळा सीर प काँटा को मुकट गुँथ'र धर दियो। ¹⁸बे ईशु को तमासो बणाबा ताँई जै-जै कार करबा लाग्या अर बे बोल्या, “ओ यहूदीयां का राजा तेरी जै हो।” ¹⁹बे ईशु क सिर प डंडा स मार'र, बिपै थुँक'र, गोडा टेक'र बिनै नमस्कार कर्या। ²⁰बे ईशु को मजाक उडा'र बिको बैंगणी गाबो तो लीया काढ अर पाछा बिकाई गाबा पीरा'र, बिनै सूळी चढाबा ताँई बारनै लेगा।

ईशु न सूळी चढाणो

²¹सिकन्दर अर रूफुस को बाप जिको नाम शमोन हो ओ कुरेन गाँव को हो इनै गाँवऊँ आतो देख बे सिपाईडा बिनै जोरदे'र ईशु की सूळी न लेज्याबा ताँई बोल्या ²²बे ईशु न गुलगुता नाम की झघा प लेगा जिको मतबल खोपड़ी की झघा ह। ²³बे ईशु न मिरि नाम की दवाई मिलेडी अंगूरी पीलाबा लाग्या



मिर्र को बोजो (15:23)

पण ईशु कोनी पीओ। ²⁴इकै पाछै बे ईशु न सूळी प चढा दियो, ईशु का गाबा लेबा ताँई बे पर्ची गेरी अर आपसरी म बानै बाट लीया। ²⁵जद बे ईशु न सूळी चढाया जणा दिनग्या का नो बजर्या हा। ²⁶अर बठै बिको दोष पत्र हो जिपै मंडर्यो हो, “यहूदीयां को राजा।” ²⁷ईशु क सागै दो डाकू बी सूळी प चढाया गया एक ईशु क दांया नाकै अर दूसरो बांया नाकै लटकायो गयो। ²⁸[अर पवित्र शास्त्र क माईनै जो बचन मंडेडा हा बे पूरा होया। की ईशु अपराध्या क सागै लटकायो जासी।]² ²⁹अर गेला मऊँ जाबाळा आपका सिरा न हला-हला’र ईशु की बेजती कर’र बे ईशु न खेर्या हा मन्दर न तोडबाळा अर तीन दिन म ओज्युँ ऊँ बणाबाळा ³⁰तळै उतर्या अर खुद न बचाले ³¹अर अंय्यां ही प्रधान याजक अर शास्त्रा न सीखाबाळा बी ईशु को मजाक उडार्या हा। अर बे आपसरी म बतळाबा लाग्या, “ओ दूसरा मिनखा न बचायो पण खुद न कोनी बचा सक्यो।” ³²अर बे ईशु न खेवै हा, “ओ इस्राइल का राजा मसी सूळी स तळै उत’र क दिखा जणा म्हें विश्वास कर लेस्यां” अर जखा डाकू ईशु क सागै सूळी प चढाया गया हा बे बी ईशु को मजाक उडार्या अर बिकी बेजती कर्या हा।

ईशु पीराण त्याग्या।


³³दोपारा बारा बजताँई सगळाँ देश क माईनै अंधेरो छायो अर करीब तीन बजे ताँई अंधकार छायो रियो। ³⁴ईशु तीन बजे जो’र ऊँ बार घाल’र खयो “इलोई, इलोई, लमा शबक्तनी।” जिको मतबल ह,

“ओ मेरा परमेशबर ओ मेरा परमेशबर तू मनै क्यालै छोड दियो?”

³⁵अर जखा मिनख बठै खड्या हा बे ईशु न अंय्यां बोलता सुण्या जणा बे खया, “ओ एलीया न बुलावै हा।” ³⁶एक मिनख भाग’र चुँखा न खाट्टो उठायडो अंगूरा का रस म डुबा’र लाठी प टांग’र ल्याओ अर ईशु न

² 15:28 क्युंक मानी-थानी पुराणी पौथियां म अ बाता कोनी मंडरी।

पीबा ताँई दियो अर खयो, “आपा देखस्यां इनै उता’रबा ताँई एलियो आवै की कोनी।”
 37जणा ईशु जोरऊँ बार घाल’र पीराण त्याग दिन्या 38अर मन्दर को परदो उप’र स ले’र तळै ताँई पाट’र दो टुकड़ा होगो। 39सेना को एक अधिकारी ईशु क सामनै खड़्यो हो ओ ईशु की बातां न सुण्यो अर देख्यो की ईशु कंय्यां आपका पीराण त्याग्या। अर बो बोलबा लाग्यो, “ओ मिनख साच्याँई परमेशबर को बेटो हो।” 40बठै लूगायां बी ही बे ईशु न दूरऊँ खड़ी खड़ी देखै ही बा लूगायां म मरियम मगदलीनी, छोटक्यो याकूब अर युसफ की माँ मरियम अर सलौमी ही। 41ईशु जद गलील क मांय न हो जणा बि बठै अ लूगायां ईशु क गेल चालबाळी ही अर अ ईशु की सेवा करती ही। अर बठै ओर बी कई लूगायां ही जखी ईशु क सागै यरूशलेम ताँई आई ही।



मंदर को परदो पाट्यो (15:38)

ईशु न कबर म धरनो

42दिन आथगो हो अर ओ अराम हाळा दिनऊँ पेलडो दिन हो जिनै तैयारी करबाळो दिन बी बोलै ह। 43ई बजै स अरिमतिया को युसफ आयो। ओ मिनख यहूदी महापंचायत को मान्यो-थान्यो हो अर परमेशबर का राज न उडीकै हो। ओ ठाडी छाती कर’र पीळातूस कनै गयो अर बिसै ईशु की लाश माँगी। 44पीळातूस न ताजुब होयो की ईशु अत्तो तावळो कंय्यां मरगो। अर बो सेना का अधिकारी न आपकै कनै बुलायो अर बिसै बूझ्यो, “बिनै मर्या बोळी देर होगी के?” 45अर पीळातूस अधिकारीऊँ समचार ले’र ईशु की लाश न युसफ न लेज्याबा को हुकम दे दियो। 46युसफ मलमल को चादरो खरिदयो अर लाश न सूळीऊँ उता’र बी चादरिया म बिनै लपेट’र ढाड क मांय खोदेडी कबर म धर दियो। अर कबर का मूंडा प बडो सारो भाट्टो लगा दियो। 47मरियम मगदलीनी अर युसफ की माँ मरियम देखै ही की बो ईशु की लाश न कठै धर्यो ह।

ईशु ओज्युँ जिन्दो होगो

16

अराम हाळा दिन क पाछै मरियम मगदलीनी, सलौमी अर याकूब की माँ मरियम ईशु की लाश प लगाबा ताँई सुगन्ध



खाली कबर जठे ईशु की लास
धरी गई ही (16:3)

आबाळी चिज मोल ली ²अर बे असा का पेल्डा दिन दितवार न सुआरे सूरज निकळता ही कबर प गई। ³बे आपसरी म खेबा लागी, “कबर क मूंडा आगै का भाट्टा न कुण सरकासी?” ⁴अर बे सामनै देखी जणा भाट्टो तो सरकेडो हो। बो भाट्टो बोळो बडो हो। ⁵बे बेगीसी कबर क मांय न जांर देखी की एक मोट्यांर धोळा गाबा पेयां दांया नाकै बैठ्यो हो अर बे बिनै देखंर उक चुक होगी। ⁶अर बो मोट्यांर बानै खयो, “थे डरो मना थे जि ईशु नासरी न हूँढो हो, जिनै सूळी प चढायो गयो हो बो अठै कोनी ह बो मरगो हो पण इब जी उठ्यो ज यकीन ना होवै तो बी झघा न देखल्यो जठे बे बिकी लाश न धर्या हा। ⁷थे अठै ऊँ जाओ अर ईशु का चेला न अर पतरस न ओ समचार देवो की बो थारै ऊँ पेल्या गलील म जासी जंय्यां बो थानै पेल्या ही बोल्यो हो। बो थानै बठै ही मिलसी।” ⁸अर बे डरगी अर ताजुब करती ही कबर ऊँ भागंर निकळी, अर बे किनैई क्युंई कोनी बताओ क्युं क बै डरगी ही। ^a

ईशु मरियम मगदलीनी न दिख्यो

⁹ईशु जिन्दो होण क पाछै दितवार हाळै दिन मरियम मगदलीनी जिमै स ईशु सात ओपरी-बलाय काढि ही बिनै दिख्यो ¹⁰बा जांर ईशु का साथ्यां न जो बोळा दुखी हा अर रोवा हा बानै ओ समचार दियो ¹¹अर बे बिकी ई बात न सुणंर की बो जिन्दो होगो ह अर बिनै दिख्यो ह बे बिकी बातां प बिश्वास कोनी कर्या।

दो चेला न ईशु दिख्यो

¹²इकै पाछै दूसरा रुप म ईशु खेत का गेला जांवता दो चेला न दिख्यो जिखा वामै स हा। ¹³बे पाछा आर ओरा न ई बात को समचार दियो पण बे बाको बी बिश्वास कोनी कर्या।

^a 16:8 सबऊँ मानी-थानी पुराणी दो यूनानी भाषा की पौथ्यां म मरकुस को चोखो समचार सोळवां पाठ की आठवी आयत प ही पूरो होज्यावै ह।

ग्यारा चेला न ईशु दिख्यो

¹⁴इकै पाछै रोटी खाबा की टेम ईशु बा ग्यारा चेला न बी दिख्यो। ईशु बाका अबिश्वास अर हिया की कलडाई प बानै दकाल्यो। क्युं क बे ईशु क जिन्दो होण को समचार देबाळा की बातां प बिश्वास कोनी कर्या। ¹⁵जणा पाछै ईशु बानै खयो, “थे सगळी धरती प जा’र चोखो समचार को हैल्लो द्यो। ¹⁶अर जो बी थारी बातां प बिश्वास करसी अर बतिस्मो लेसी बिको उद्धार होसी अर जो बिश्वास कोनी करसी बो पापीई रेहसी अर सजा भोगसी। ¹⁷मेर म बिश्वास करबाळा म अ चिन होसी की बे मेरा नाम ऊँ ओपरी-बलाय काढसी अर बे नई-नई भाषा बोलसी। ¹⁸ज बे आपका हाथाऊँ साँप बी पकड़ै अर झैर बी पी ज्यावै तो बि बाकै क्युंई कोनी होसी, अर बे रोगला प हाथ धरसी जणा बे ठिक हो ज्यासी।”

ईशु को ईश्वर नगरी म उठायो जाणो

¹⁹अ सारी बातां बोलबा क पाछै ईशु ईश्वर नगरी म उठा लियो गयो अर परमेश्वर क दांया नाकै जा’र बैठगो। ²⁰अर बिका चेला झघा-झघा जा’र प्रबु को परबचन दियो। बाकै सागै प्रबु काम कर्यो हो। अर बो चमत्कारी चिनाऊँ बचना न सच कर्यो।